

ZAPISNIK O RADU SA
22. RADNE SJEDNICE SKUPŠTINE KANTONA SARAJEVO
ODRŽANE U UTORAK, 03.03.2020. GODINE
SA POČETKOM RADA U 10,00 SATI

Predsjedavajući Mirza Čelik (u daljem tekstu: Predsjedavajući) je pozdravio sve prisutne i otvorio 22. Radnu sjednicu Skupštine Kantona Sarajevo.

/HIMNA/

Prema evidenciji Službe, sjednici prisustvuje 34 zastupnika i zastupnica, što je dovoljan broj za punovažan rad i odlučivanje.

Sjednici su prisustvovali/le zastupnici/zastupnice:

SDA - STRANKA DEMOKRATSKE AKCIJE

1. Hamed Aljović
2. Jasmina Bišćević-Tokić
3. Samra Čosović-Hajdarević
4. Aljoša Čampara
5. Mirza Čelik
6. Sabahudin Delalić
7. Mahir Dević
8. Amra Hasagić
9. Admela Hodžić
10. Smiljana Viteškić

POLITIČKA ORGANIZACIJA "NAROD I PRAVDA"

1. Vedran Jakupović
2. Elmedin Konaković
3. Danijela Kristić
4. Amel Mekić
5. Arijana Memić
6. Elvedin Okerić

POLITIČKA ORGANIZACIJA GRAĐANA "NAŠA STRANKA"

1. Vildana Bešlija
2. Neira Dizdarević
3. Vibor Handžić

SOCIJALDEMOKRATSKA PARTIJA BOSNE I HERCEGOVINE

1. Segmedina Bajramović Srna
2. Igor Stojanović
3. Samir Suljević

SAVEZ ZA BOLJU BUDUĆNOST BIH – FAHRUDIN RADONČIĆ

1. Zvonko Marić
2. Dževad Poturak
3. Bilsena Šahman

DEMOKRATSKA FRONTA

1. Senad Hasanović
2. Bibija Kerla
3. Sead Milavica

NEZAVISNA BOSANSKOHERCEGOVAČKA LISTA

1. Amra Junuzović-Kaljić

BOSS-BOSANSKA STRANKA – MIRNES AJANOVIĆ

1. Haris Pleho

SAMOSTALNI ZASTUPNICI/ZASTUPNICE:

1. Damir Nikšić
2. Fahrudin Pecikoza
3. Damir Marjanović
4. Elvis Vreto
5. Jasna Duraković

Kašnjenje je najavio zastupnik Vedran Jakupović.

Prijedlog dnevnog reda 22. Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 18.02.2020.godine.

Na osnovu člana 73. Poslovnika Skupštine Kantona Sarajevo, Kolegij Skupštine Kantona Sarajevo, dana 27.02.2020. godine, prihvatio je da se Prijedlog dnevnog reda 22. Radne sjednice, dopuni sa sljedećim tačkama:

1. Prijedlog odluke o potvrđivanju Vlade Kantona Sarajevo; (razmatraće se kao tačka 2.);
2. Prijedlog odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo; (razmatraće se kao tačka 3.);
3. Prijedlog odluke o izmjeni Odluke o imenovanju predsjednika, zamjenika predsjednika i članova Odbora za javna priznanja Skupštine Kantona Sarajevo; (razmatraće se kao tačka 4.);

UTVRĐIVANJE DNEVNOG REDA SJEDNICE

Prije samog utvrđivanja dnevnog reda, zastupnik Elmedin Konaković je intervenisao vezano za Odluku o potvrđivanju Vlade Kantona Sarajevo: “Prije nego što glasamo o dnevnom redu, danas ste u dnevni red uvrstili jednu jako krupnu i vako važnu tačku, ona se zove „Imenovanje Vlade Kantona Sarajevo”. Molim vas da mi predlagač ili vi predsjedavajući, ili sekretar objasni koju ste poslovničku mogućnost koristili kako bi ste ono što je precizno propisano Poslovníkom a kaže da se imena dostavljaju 12 dana prije održavanja sjednice, provukli i kao dopunski materijal dostavili Imenovanje Vlade Kantona Sarajevo pet ili šest dana prije samog održavanja sjednice. To će naravno uticati na naše glasanje u samom dnevnom redu. Molim za pojašnjenje.”

Predsjedavajući Čelik je dao pojašnjenje te pročitao odredbe Poslovnika kako slijedi: “Odredbe člana 17, znači nadležnost Kolegija jeste da utvrđuje prijedlog dnevnog reda za sjednicu Skupštine Kantona Sarajevo i kao i dopustiti ćete mi, član 73. Pročitat ću vam.

„Prijedlozi za izmjenama prijedloga dnevnog reda radne sjednice dostavljaju se Kolegiju u pismenoj formi i sa obrazloženjem najkasnije četiri dana prije održavanja sjednice”. Znači poslovnička mogućnost je bila da neko od zastupnika zatraži dopunu dnevnog reda i to je učinjeno i Kolegij je utvrdio prijedlog dnevnog reda kako je i predloženo.”

Zastupnik Elmedin Konaković se javio za riječ ističući sljedeće: “Ne znam da li ste svjesno ili nesvjesno izbjegli najvažniji dio Poslovnika koji jasno precizira način imenovanja nove Vlade. Zaista je šteta da nakon svih gafova koje ste napravili ovu Vladu uvedete potpuno neposlovnički u njen cijeli mandat. Dakle član 204 precizno kaže i propisuje kako se i na koji način bira Vlada Kantona Sarajevo. Dakle nikada se nije desilo, nikada u ovoj sali da neko to stavi kao dopunu dnevnog reda jer piše da se materijal dostavlja 12 dana ranije. I ono što vi naravno radite jeste imamo ruke, lomiti ćemo, kršiti ćemo, i to je s političkog aspekta potpuno adekvatno. Niti ste organizirali neke druge. Mene zanima dakle zašto izbjegavate naravno taj 204 i tražit ću naravno pauzu od 15 minuta za konsultacije sa klubovima kako bi smo utvrdili mogućnost da li da uopšte glasamo o ovakvom dnevnom redu, a svjesni činjenice da je na istom dnevnom redu Budžet, koji je najvažniji dokument za građane Kantona Sarajevo o kojem se danas svakako mora raspravljati. Tako da bih volio da mi kažete, evo sekretar ili neko da li je zaista moguće da Vladu Kantona Sarajevo imenujete kao dopunski materijal.”

Nakon diskusije zastupnika Konakovića za riječ se javio i Damir Nikšić tražeći pojašnjenje od sekretarke Skupštine.

Sekretarka po ovlaštenju Almira Kulovac Šetkić je istakla sljedeće: “Ja sam upravo htjela da kažem da ja nisam nadležna da dajem tumačenje odredbi Poslovnika, čak nekako izbjegavam da dajem mišljenja, nego nastojim samo da upućujem na odredbe Poslovnika koje regulišu neku situaciju, koja je ovdje sporna. Ovdje se pozivate na član 194 i član 204 koji govore o tome kada se moraju dostaviti imena. Član 194 kaže da se dostavljaju predsjedavajućem, znači ne govori zastupnicima nego predsjedavajućem najmanje 14 dana prije održavanja sjednice. Ja koliko sam vidjela iz materijala, imala sam, vidjela sam da je to dostavljeno 14 dana. Što se tiče samog dostavljanja zastupnicima, moje lično mišljenje je, koje baziram na članu 194 stav 3) koji kaže da je predsjedavajući dužan dostaviti poslanicima obrazloženje prijedloga najmanje tri dana prije održavanja sjednice na kojoj će se vršiti izbor odnosno imenovanje. Toliko.”

Nakon obraćanja sekretarke zatražena je pauza u trajanju od 15 minuta.

NASTAVAK NAKON PAUZE

Nakon pauze zastupnik Elmedin Konaković je imao poslovničku intervenciju: “Pa dužan sam nakon što sam zatražio pauzu izvijestiti o epilogu nakon konsultacija sa šefovima klubova bez obzira što ste u svom odgovoru zanemarili vrlo bitne članove Poslovnika, član 71 koji precizira način sazivanja sjednice i slanje materijala 12 dana ranije. Da vam bude iskren meni se sviđa što se pozivate na ovaj član 194 jer ona kasnije ima jedno vrlo ozbiljno obrazloženje, koje ćete morati obrazložiti o amandmanima koje ste uložili, a piše da morate tri dana ranije. Da to ne komplikujem, o tome ćemo poslije, i još neka pitanja koja ćemo vam postaviti. Samo da konstatujem da je član 71 precizan kod sazivanja Skupština i slanja materijala. Posebno ćemo govoriti o tome šta su amandmani, kako Poslovnik precizira amandmane. Ali zaista zbog važnosti današnje sjednice i samog budžeta, prije svega, dogovorili smo se da podržimo

sam dnevni red i pravo da vam kažem, malo nam je užitak da ljudi gledaju šta se ovdje u Skupštini Kantona Sarajevo dešava. Tako da ćemo glasati za dnevni red. Hvala.”

Nakon zastupnika Konakovića za riječ se javila zastupnica Neira Dizdarević: “S obzirom da se prvi put javljam, pozdravljam sve prisutne u sali kao i gledatelje ispred malih ekrana, u ime Kluba Naše stranke, želim da podsjetim da ste zaista dakle prekršili član 194 Poslovnika koji kaže da se prijedlozi dostavljaju u pismenoj formi sa obrazloženjem predsjedavajućem Skupštine najmanje 14 dana. Dakle niste prije 14 dana dobili imena dva ministra koja ste nam jutros u vidu amandmana dostavili. Te predsjedavajući je dužan dostaviti poslanicima obrazložene prijedloge najmanje tri dana održavanja sjednice. Mi smo na ulazu u skupštinsku salu dobili dva CV kao da se radi o izmjenama dva člana nekog Zakona a ne o dva čovjeka, odnosno dva ministra. Ipak, s obzirom da je na podnevom redu danas budžet Kantona Sarajevo a da smo već u mjesecu martu i da nam krajem mjeseca ističe odluka o privremenom finansiraju, samo iz tog razloga ćemo podržati ovaj dnevni red, a sigurna sam da će navedene procedure dobiti svoj epilog na Ustavnom sudu. Hvala.”

Nakon obraćanja zastupnice Dizdarević uslijedilo je utvrđivanje dnevnog reda.

Prijedlog dnevnog reda 22. radne sjednice Skupštine Kantona Sarajevo glasi:

1. Poslanička/zastupnička pitanja, inicijative i odgovori;
2. Prijedlog odluke o potvrđivanju Vlade Kantona Sarajevo;
3. Prijedlog odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
4. Prijedlog odluke o izmjeni Odluke o imenovanju predsjednika, zamjenika predsjednika i članova Odbora za javna priznanja Skupštine Kantona Sarajevo;
5. Prijedlog budžeta Kantona Sarajevo za 2020. godinu;
6. Prijedlog zakona o izvršavanju Budžeta Kantona Sarajevo za 2020. godinu
7. Prijedlog zakona o kažnjavanju govora mržnje Kantona Sarajevo - skraćeni postupak;
8. Prijedlog odluke o davanju saglasnosti na Finansijski plan Javne ustanove „Služba za zapošljavanje Kantona Sarajevo“ Sarajevo za 2020. godinu sa Odlukom o izvršavanju Finansijskog plana Javne ustanove „Služba za zapošljavanje Kantona Sarajevo“ Sarajevo za 2020. godinu;

PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE O PREDLOŽENOM DNEVNOM REDU. NAKON ELEKTRONSKOG GLASANJA KONSTATOVANO JE DA JE SKUPŠTINA JEDNOGLASNO (35 „ZA”) USVOJILA DNEVNI RED ZA 22. RADNU SJEDNICU.

Zastupnica Bibija Kerla se javila za riječ i predložila da se Poslanička pitanja i inicijative razmatraju kao posljednja tačka. Ovaj prijedlog je stavljen na glasanje i nakon glasanja, (19 “za”, 14 “protiv” i 2 “sudržana”) konstatovano je da je Skupština usvojila prijedlog izmjene dnevnog reda tako da se prva tačka razmatra kao posljedna tačka .

AD – 2.

PRIJEDLOG ODLUKE O POTVRĐIVANJU VLADE KANTONA SARAJEVO

Prijedlog navede Odluke i biografije kandidata su zastupnici i zastupnice dobili/e u dopunskom materijalu.

Zastupnik Damir Marjanović je poslovnički intervenisao vezano za razmatranje Zakona o kažnjavanju govora mržnje Kantona Sarajevo.

Uvodne napomene podnio je zastupnik Mahir Dević ističući sljedeće: “Znači vama je dostavljeno to u pismenoj formi, znači na bazi prijedloga koji je dostavio kandidat za premijera Kantona Sarajevo gospodin Mario Nenadić, znači u tački 1 Prijedlog odluke o potvrđivanju Vlade Kantona Sarajevo a koju ste dobili u materijalima prethodno za ovu sjednicu, tačke 10 i 12 se mijenjaju i glase, na poziciji 10. Kenan Alikadić – Ministarstvo kulture i sporta, 12. Hajrudin Grabovica – Ministarstvo za boračka pitanja Kantona Sarajevo. Obrazloženje: kandidat za premijera Kantona Sarajevo gospodin Mario Nenadić, obratio se komisiji za izbor i imenovanja sa prijedlogom novih kandidata za ministre u Vladi Kantona Sarajevo budući da su dosadašnji kandidati Emir Hadžihafizbegović i Senad Hasanspahić odustali od kandidature za ministre u Vladi Kantona Sarajevo. S tim u vezi, Komisija za izbor imenovanja je imala sastanak, pripremila prijedlog amandmana na bazi onog zahtjeva kojeg je dostavio mandatar, u skladu s Poslovnikom o radu Skupštine Kantona Sarajevo. I to danas imate u materijalima. Hvala.”

U nastavku Predsjedavajući je otvorio prostor za pitanja vezano za Prijedlog odluke o potvrđivanju Vlade Kantona Sarajevo. Pitanja su postavili zastupnik Vedran Jakupović, zastupnik Elmedin Konaković, zastupnik Damir Nikšić, dopredsjedavajuća Danijela Kristić, zastupnik Damir Marjanović, zastupnica Jasna Duraković, dopredsjedavajući Vibor Handžić, zastupnik Samir Suljević, zastupnica Bibija Kerla i zastupnik Igor Stojanović.

Nakon iscrpljene liste prijavljenih predsjedavajući je pozvao kandidata za premijera Kantona Sarajevo, gospodina Marija Nenadića, da se obrati Skupštini, i iznese svoj Ekspoze i ukratko predstavi buduće ministre i ministrice u Vladi Kantona Sarajevo.

Kandidat za premijera Mario Nenadić: (EKSPOZE)

Poštovani građani Kantona Sarajevo, poštovani predsjedavajući i zamjenici predsjedavajućeg, gospodo zastupnici, dragi gosti, predstavnici stručnih službi i medija, dozvolite mi da Vas najsrdačnije pozdravim i da na samom početku izrazim svoju zahvalnost na ukazanoj prilici da vam predstavim planove i načela rada i djelovanja Vlade Kantona Sarajevo za naredne tri godine .

Želio bih se također zahvaliti i predstavnicima domaćih i međunarodnih institucija i organizacija, federalnim, kantonalnim, općinskim i gradskim rukovodstvima i zaposlenima, predstavnicima organizacija civilnog društva, privrednicima i građanima na vrlo korisnim konsultacijama koje smo obavili prethodnih dana, po pitanju prioriteta i ciljeva rada buduće Vlade Kantona Sarajevo. Vjerujem da će oni svoje prijedloge i zahtjeve iskazane tokom konsultacija, prepoznati u ovom ekspozeu. Obavljene konsultacije bile su prilika za kratku reviziju stanja i potreba, trenutnih dešavanja i problema sa kojima se susreću građani Kantona. Konsultacije su dale puno svjetla članovima nove Vlade Kantona i stručnim timovima, da usaglasе ovaj ekspoze i njegove sastavne dijelove. Nova Vlada radit će brzo i „u hodu“ rješavati određena urgentna pitanja, ali će istovremeno pokrenuti odnosno nastaviti sa radom na sistemskim preslaganjima nagomilanih problema u Kantonu. U svakom resoru izvršili smo „blic“ pregled realiziranog u godini mandata trenutne Vlade i spremni smo sve pokrenute pozitivne procese podržati, dodatno unaprijediti i ubrzati . Istovremeno, imamo puno novih ciljeva i usaglašenih prioriteta, želimo ih što prije dati u realizaciju. Vrijeme koje je pred nama, želimo iskoristiti da damo doprinos, prije svega ubrzanju europskog puta Bosne

i Hercegovine, pa time i Kantona Sarajevo, ali ne deklarativno, nego kroz stvaranje uvjeta za ostvarivanje širokog spektra konkretnih mjera i aktivnosti na zaštiti i ostvarivanju ljudskih prava i sloboda, koje danas uživaju građani Unije, a na žalost u Bosni i Hercegovini, vidljivi su uglavnom na kratko i obično u vrijeme izbornih i drugih promotivnih kampanja. Članovi buduće Vlade Kantona, spremni su svo svoje iskustvo staviti u funkciju unaprijeđenja života i standarda svih nas, građana Kantona Sarajevo, a posebno mladih. Bićemo snažan vjetar u leđa europskim integracijama i razvijati naš Grad, Kanton i domovinu Bosnu i Hercegovinu, kao prostor tolerancije, suživota i nade. Duže od 25 godina bavim se pitanjima zaštite ljudskih prava i temeljnih sloboda, te osjećam obavezu da nas danas, sa ovog privilegovanog i časnog mjesta, podsjetim na univerzalne vrijednosti i na ono na što se stalno pozivamo, a često više ni sami sebi ne vjerujemo kada o tim vrijednostima govorimo.

Podsjetit ću nas dakle, na vrijednosti, koje čine u svojoj osnovi taj često spominjani europski put, a nema jednostavnijeg načina da to uradim, nego pročitati samo par rečenica iz preambule Povelje Europske unije o temeljnim pravima. Ako neko ima strpljenja za to, možda na svakom mjestu gdje spomenem uniju, da zamislite mjesto Kanton Sarajevo ili BIH, i bit će nam svima jasno o čemu govorim, dakle citiram preambulu Europske povelje o ljudskim pravima: „Narodi Europe, stvarajući sve tješnje povezanu uniju među sobom, odlučni su dijeliti miroljubivu budućnost utemeljenu na zajedničkim vrijednostima. Svjesna svojeg duhovnog i moralnog nasljeđa, Unija se temelji na nedjeljivim, univerzalnim vrijednostima ljudskog dostojanstva, slobode, jednakosti i solidarnosti; ona se temelji na načelima demokracije i vladavine prava. Ona pojedinca postavlja u središte svojeg djelovanja uspostavom statusa građana Unije i stvaranjem područja slobode, sigurnosti i pravde.

Unija doprinosi očuvanju i razvoju tih zajedničkih vrijednosti uz poštovanje raznolikosti kultura i tradicija naroda Europe, kao i nacionalnih identiteta država članica i organizacije njihovih tijela javne vlasti na nacionalnoj, regionalnoj i lokalnoj razini. Ona nastoji promicati uravnoteženi i održivi razvoj i osigurava slobodno kretanje osoba, usluga, robe i kapitala te slobodu poslovnog okruženja. U tu svrhu nužno je ojačati zaštitu temeljnih prava u svjetlu promjena u društvu, društvenog napretka, te naučnog i tehnološkog razvoja, tako da budu vidljivija u Povelji.

Ova Povelja potvrđuje, uz dužno poštovanje nadležnosti i zadataka Unije te načela supsidijarnosti, prava koja proizlaze osobito iz ustavnih tradicija i međunarodnih obveza zajedničkih državama članicama, iz Europske konvencije za zaštitu ljudskih prava i temeljnih sloboda, iz socijalnih povelja koje su usvojile Unija i Vijeće Europe, te iz prakse Suda Europske unije i Europskog suda za ljudska prava... Uživljanje ovih prava podrazumijeva odgovornosti i dužnosti prema drugim osobama, ljudskoj zajednici i budućim naraštajima."

Tako kratko, a sve je u suštini rečeno ! A zašto sam ovaj citat izdvojio za sami početak mog obraćanja danas ?

Želja mi je bila da nas sve podsjetim i opomenem gdje se mi kao društvo trenutno nalazimo, kakvim se sporednim pitanjima bavimo i koliko smo se udaljili od gore citiranih europskih i civilizacijskih vrijednosti .

Pozivam nas sve da se mijenjamo, da mijenjamo našu praksu i da počnemo odmah! U tom smislu, obećavam da će ova Vlada nastaviti da razvija i promovira tradiciju i običaje svih naših naroda, njihovu vjeru i kulturu, i istovremeno će njegovati naše zajedničke vrijednosti i uporno tražiti puteve za vraćanje međusobnog povjerenja . Pri tome, čuvat ćemo i jačati

sjećanje na sve naše žrtve, na ubijenu djecu i civile Sarajeva, veliki broj nestalih i ranjenih i na višegodišnju opsadu i patnju našeg Grada i Kantona!

II - Načela i pravci Sarajevo

Načela i pravci rada i djelovanja Vlade Kantona, prije svega želim da kažem da ćemo se mi rukovoditi i kretati u budućem radu u okviru načela zakonitost, zaštita javnog interesa, transparentnosti i borba protiv korupcije, ravnopravnost i jednakost pred zakonom, zaštita manjina svih vrsta i tzv. „isključenih“ grupa, savjesnosti i odgovornosti. Ova Vlada ni na koji način neće doprinijeti neprihvatljivoj javnoj retorici, niti će voditi osvetničku niti svađalačku politiku. Dobili smo legalnu priliku i skupa sa svima vama želimo je iskoristiti u službi boljitka svih nas u Kantonu Sarajevo i BiH. Budite sigurni da ni jednu ružnu i neprimjerenu riječ nećemo uputiti našim prethodnicima niti saradnicima, jer time samo umanjujemo šansu, priliku da uradimo nešto dobro i očekivano za naše narode i građane i za generacije koje dolaze.

Također vas sve molimo nemojte Vladu pokušavati uvući u visoku politiku, to je posao vas uvaženih zastupnika i viših nivoa vlasti u našoj zemlji. Na žalost, pokazuje, da svi vole da se bave visokom politikom, ali u realnim okolnostima u kojima živimo, to može biti samo prepreka i smetnja u realiziranju onih običnih, svakodnevnih, životnih interesa i pitanja, od kojih naši građani žive. Želimo raditi i stvarati na kantonalnom nivou, tamo gdje jesmo, na jednom prilično lokalnom nivou u skladu sa europskim dokumentima i propisima u BiH, u administrativnim okvirima Kantona i u skladu sa Zakonom o Vladi KS, Zakonom o organizaciji i djelokrugu organa uprave i upravnih organizacija u KS i drugim važećim propisima u skladu sa Ustavom BiH, Ustavom FBiH Ustavom Kantona Sarajevo, i naravno Europskom poveljom o lokalnoj samoupravi i drugim ratificiranim i potpisanim međunarodnim dokumentima.

Vlada će svoj posao raditi tinski, onako kako smo i pripremali ekspozice, a sa druge strane vodit će je dovoljno decentralizirano, što bi značilo da će svaki ministar u okviru propisanih pravila, imati tačno onoliko slobode u postupanju koliko je usaglašeno i utvrđeno važećim propisima, usvojenim budžetom i zaključcima Vlade i Skupštine Kantona. Svoj posao ćemo obavljati profesionalno, sa stručnim službama i zaposlenim državnim službenicima i namještenicima, s ciljem što efikasnijih rezultata, koji u konačnici, moraju biti mjerljivi i vidljivi.

Svjesni smo da smo iz više razloga, vrlo važan kanton, kanton glavnog grada, sa sjedištem brojnih domaćih i međunarodnih institucija i organizacija. Oči su uprte u nas i time je naša odgovornost još veća.

Međunarodnim organizacijama i institucijama obećavamo i ujedno od njih tražimo, maksimalnu saradnju i dogovaranje oko ubrzane realizacije međunarodnih dokumenata, ugovora i projekata, kao i oko uspostave najboljih puteva i praksi za naše europske integracije u skladu sa ključnim prioritetima iz Mišljenja Komisije o zahtjevu BiH za članstvo u Europskoj Uniji.

Kao što vidite, pored zaštite interesa konstitutivnih naroda i grupe ostalih, kroz prizmu ostvarivanja prava i interesa svih stanovnika Kantona i njegovih posjetitelja i gostiju, radit ćemo posvećeno i na posebnom tretmanu i zaštiti manjina svih vrsta, jer u dugogodišnjoj neravnopravnoj borbi za „mjesto pod suncem“, ovi „slabiji“ su postali dodatno „nevidljivi“.

Sarajevo planiramo brže i jače otvarati prema užem i širem okruženju. To se od nas očekuje, jer Sarajevo je oduvijek bilo prepoznatljivo po svojoj otvorenosti. Kada se toj tradicionalnoj otvorenosti doda i dio savremenog, onog kako moderan svijet danas živi, zaista možemo očekivati dobre rezultate.

Različitim mehanizmima, kroz donošenje odgovarajućih propisa gdje je god to moguće, ali i ciljanim projektima i koordinacijama, radit ćemo na suzbijanju govora mržnje. Zato mi je drago da i sa na današnjem dnevnom redu nalazi ovako jedan jako važan Zakon za građane Kantona.

Za oblasti u kojima ne postoje, donijet ćemo razvojne strategije ili dorađivati već postojeće, a u tom pravcu na raspolaganju nam je i to ćemo svesrdno koristiti, pomoć od strane brojnih međunarodnih organizacija i fondova. Struka i strategije, razvojni planovi gdje god ne postoje, treba ih osigurati i donijeti.

Ad hoc rješenja su nas i dovela do stanja u kojem je društvo danas. Jasno nam je da je rad na sistemskim rješenjima skup, da ne daje vidljive rezultate odmah, ali bez vizije i strategija, neće biti značajnih iskoraka i aktivnosti će davati samo trenutne rezultate bez trajnih i perspektivnih rješenja za generacije koje dolaze iza nas.

Što se tiče odnosa među brojnim institucijama i organizacijama unutar Kantona i odnosa prema višim nivoima vlasti, cilj našeg rada biće unaprijediti odnose na relaciji Kanton-Grad-općine, kako međusobno, tako i prema Federaciji i BiH. Potrebna je bolja saradnja, češće koordinacije, usaglašeni ciljevi i zajednički projekti, sa redovnom analizom i pregledom realiziranog. Imamo tri nivoa vlasti u Kantonu, podjela nadležnosti nije jasna, rješavanje pitanja lokalne samouprave u Kantonu traje decenijama, administracija je skupa i neefikasna. U godini smo lokalnih izbora, rizici su veliki i ova se koordinacija mora odvijati na dnevnoj osnovi .

Borba protiv korupcije će se nastaviti u skladu sa preporukama nadležnih tijela Europske Komisije i domaćim strateškim dokumentima i propisima. Korupcija je i dalje jedan od najvećih problema u našem društvu i široko je rasprostranjena, kako stoji i u Analitičkom izvještaju Europske komisije .

Javna potrošnja nije smanjena, čak imamo indicije da je povećana u prethodnom periodu, ovo se mora promijeniti. Prije svakog novog prijema zaposlenika u javni sektor, izvršit ćemo pregled unutrašnjih kapaciteta i insistirati na boljoj unutrašnjoj iskorištenosti i preraspodjelama. Brine podatak da je na budžetu Kantona za ovu godinu 14005 osoba zaposlenih u čak 230 institucija Kantona, za koje se izdvaja blizu 471 miliona KM!

Razvoj je tokom svih poratnih godina išao presporo u svim segmentima, a posebno u oblasti ekonomije. Bruto domaći proizvod (BDP) po stanovniku je nepunih 5000 eura godišnje, a to je na nivou 50 % regionalnog BDP-a, odnosno svega oko 15 % prosjeka BDP-a svih država

članica Europske unije. U Kantonu je oko 140.000 zaposlenih i oko 62.000 nezaposlenih osoba.

U saradnji sa Službom za zapošljavanje KS, Privrednom komorom i Ekonomsko- socijalnim vijećem, upoređivat ćemo potrebe i mogućnosti, ispitati šta na tržištu nedostaje, a rezultat takvog rada i analiza, za cilj će imati pripremu posebnih ciljanih projekata u svrhu povećanja broja zaposlenih u realnom sektoru u Kantonu.

Imamo ogroman javni sektor i taj mehanizam mora bolje raditi i stvarati, zarađivati i za sebe i za one koji nisu imali tu privilegiju, u ovakvim uvjetima, raditi „za državu“. Ako je već tako, onda rezultati koje ta armija zaposlenih daje, morat će biti puno vidljiviji. Insistirat ćemo na uvođenju principa korporativnog upravljanja u javnim preduzećima u nadležnosti Kantona Sarajevo.

U tom kontekstu, „dani otvorenih vrata“ za građane u javnom sektoru neće postojati u mandatu ove Vlade, a razlog je jednostavan : Dani otvorenih vrata će biti svaki radni dan, a tamo gdje je to neophodno imat ćemo i dodatne dežure i pripravnosti. Javna uprava će postati puno dostupnija građanima, kako kroz olakšan pristup službama, ubrzanje rješavanja njihovih predmeta, tako i unaprijeđenjem transparentnosti i vidljivosti onoga što se u javnom sektoru radi i dešava ili možda ne radi i ne dešava. Ovo se odnosi i na brži i transparentniji rad pravosuđa, bez ikakve namjere da se na bilo koji način uplićemo u njihovu nezavisnost i samostalnost.

Politike i odnose sa sindikatima želimo unaprijeđivati i stabilizirati kroz argumentiran socijalni dijalog. Težište interesa će se prebacivati na zapostavljeni realni sektor, pokretanje privrednih aktivnosti i unaprijeđeno zapošljavanje u tom sektoru .

Na nekoj od prvih sjednica, pregledat ćemo i kao posebnu sjednicu Vlade, obaviti raspravu o načinu ubrzanje i potpune implementacije odluka ustavnih sudova kada se radi o obavezama i odgovornostima Kantona. Neprihvatljivo je da su odluke Ustavnog suda, postale mrtvo slovo na papiru i da se na njihovu realizaciju čeka godinama. Time se najdirektnije urušavaju temelji svake, pa tako i naše države i Kantona Sarajevo kao njenog dijela, čime svakim danom postajemo sve udaljeniji od Europe i njenih vrijednosti.

Na istoj tematskoj sjednici, pregledat ćemo i preporuke ombudsmena za ljudska prava koje se odnose na Kanton Sarajevo, u svijetlu njihove uloge i značaja u sistemu. Moramo predvoditi procese, ne možemo se mjeriti prema drugim kantonima u FBiH, jer mi smo ti od kojih se očekuje da povedemo promjene. Brojne preporuke ombudsmena su ignorisane i tematskim sjednicama Vlade, rješavat ćemo jednu po jednu i time vraćati poljuljano povjerenje u institucije sistema.

Radit ćemo na dovršetku procesa povratka raseljenih i izbjeglih osoba i povrata imovine kroz prizmu implementacije Anexa VII Dejtonskog mirovnog sporazuma (Sporazum o izbjeglicama i raseljenim osobama) i Anexa VI (Sporazuma o ljudskim pravima), te omogućiti konačnu implementaciju u dijelu rekonstrukcije i povratka, ali i konačnog raspuštanja kolektivnih centara za raseljene osobe u Kantonu Sarajevo.

Na tom planu uspostaviti ćemo kontinuiranu saradnju sa državnim i entitetskim institucijama za zaštitu ljudskih prava i temeljnih sloboda.

Kako u zemlji tako i izvan nje, nastaviti ćemo borbu za povrat imovine Kantona, koja je ostala nezaštićena i nije na raspolaganju građanima Kantona. Posebno se to odnosi na našu imovinu izvan prostora Bosne i Hercegovine.

Jedan od prioriteta u našem radu biće unaprijeđenje mjera zaštite od zagađenja zraka u Kantonu. Ovo je pitanje šire od bilo kog resora u Vladi KS i zato svi moramo dati doprinos. Planiramo kombiniranjem sistemskih rješenja i konkretnih projekata i mjera, uz pomoć dostupnih međunarodnih fondova i ciljanih projekata, unaprijediti stanje u ovoj oblasti. Sve što je poduzeto na tom planu, preispitati i dodatno podržati. U ovom Expozeu nalaze se po resorima, brojne mjere s ciljem smanjenja zagađenja zraka u Kantonu.

Ove mjere neće dati vidljive rezultate odmah, u godini ili dvije, trebat će puno vremena i ulaganja kako bi se unaprijedilo ovo stanje, ali krenuti se mora odmah, jer Kanton je desetinama godina zatvaran, gušen i vrijeme je u najmanju ruku da se to zaustavi i da se otpočne sa „liječenjem i oporavkom“.

Svjesni činjenice da su pitanja migracija, izbjeglica i azila, jedna od izvornih nadležnosti institucija BiH, svakako da ćemo u dijelu migracija jako poštovati o čemu govore i što budu kao politike donosile politike BiH, međutim ne smijemo pri tome zaboraviti da niti BiH, niti Kanton Sarajevo niti bilo koji dio naše zemlje nije eksteritorijalan u bilo kom pogledu i da ćemo u toliko svakako svi skupa morati dati doprinos za ublažavanje posljedica ekonomske migrantske krize u BiH u regionu, a evo vidimo i šire. U tom dijelu naših obaveza i odgovornosti sigurno da ćemo preuzeti onaj dio naših obaveza koji se odnosi na onaj često spominjani pristup pravima, pravo na osiguranje smještaja, zdravstva i drugih pitanja, evo da ne idem daleko jer ću otvoriti neka druga pitanja što mi nije cilj na današnjoj sjednici.

Jačati ćemo ulogu civilnog društva kao temelja demokratskog sistema u svakom društvu, kroz konkretne mjere i projekte, a posebno jačati modele koordinacije kroz unaprijeđene konsultacije pri utvrđivanju politika i donošenju propisa, a posebno pri raspodjeli javnih sredstava organizacijama civilnog društva .

U fokusu našeg djelovanja, biće mladi. Želimo im omogućiti da rade i stvaraju ovdje u svojoj zemlji, da uče i istražuju ono što vole i za što imaju afiniteta, da ih se uvažava, da svoj pripravnički staž ostvare u razumnom roku po diplomiranju i završetku školovanja i time steknu uvjete da izađu na tržište rada, da se zaposle u struci, da se ne stide svoje domovine i da postanu građani svijeta, ali ovdje u svojoj zemlji! Cilj će nam biti unaprijeđenje položaja i utjecaja mladih kroz Vijeće mladih Kantona i kroz druge uspostavljene mehanizme saradnje i koordinacije. Tražit ćemo i podržavati uključivanje mladih u sve segmente upravljanja i odlučivanja i u sva savjetodavna i druga tijela u javnom sektoru, jer mladih nije bilo dovoljno ni u radu ekonomsko socijalnog vijeća, ni u radu sindikata, ni u raznim komisijama, pa ni u Uredu za borbu protiv korupcije i sl. Kako svi bolje znaju šta treba mladima, osim njih samih. To ćemo mijenjati ! Mladi će biti više zastupljeni u komisijama koje odlučuju o školstvu, dodjeli subvencija za kupovinu stanova, u komisijama za pripremu i dodjelu projekata Službe za zapošljavanje i za dodjelu raznih poticaja. Tek tada, kada se uvjere kako se i na koji način donose odluke od kojih zavisi njihova budućnost, vjerovat će vlastima. Podrška projektima za mlade biće veća i transparentnija.

Mlade ćemo poticati da uče o toleranciji i otvorenosti. Podsjećamo ih ovom prilikom da je i grb Kantona posebna priča o tome. Kombinacija zvekira sa Svrzine kuće i rozete, ukrasa sa sarajevske katedrale, simboli su višestoljetnog nasljeđa i utjecaja velikih civilizacija sa Istoka

i Zapada. A u gornjem dijelu našeg grba, raspoređeno je devet zlatnih zvjezdica, simbola devet općina Kantona Sarajevo. Nema ljepše priče o našem Gradu i Kantonu!

U pripremi ovog Expozea obavili smo neophodne konsultacije sa svim načelnicima općina i Gradonačelnikom i njihovim saradnicima, sa predstavnicima brojnih domaćih i međunarodnih institucija, vladinih i nevladinih organizacija i građanima, od kojih smo dobili konkretne podatke i prijedloge prioriternih zajedničkih projekata. Expoze je kao rezultat takvog rada, u stvari pregled skeniranih potreba Kantona, sa vrlo konkretnim ciljevima, zadacima i projektima.

U nastavku ćemo dati kratak pregled ciljanih aktivnosti koje planiramo provoditi po resorima, a prilog Expozeu je i detaljniji pregled ciljeva i planiranih aktivnosti, kao i pregled iskazanih prioriteta i konkretnih projekata po općinama i resorima, koje ćemo skupa sa predlagačima razmotriti na tematskoj sjednici Vlade, kada budemo znali pravo stanje budžetskih i drugih mogućnosti.

Dozvolite mi da kratko prođem kroz sve resore iz mandata Vlade kako bih rekao na što će ova Vlada biti koncentrisana. Redoslijed nisam pravio zato što sam nekako najposvećeniji Ministarstvu pravde i uprave Kantona Sarajevo i ovom prilikom pozdravljam i svoju uvaženu kolegicu gospođu Lejlu Brčić nego zato što je tako rekao Zakon o organizaciji i djelokrugu i Zakon o Vladi, tako ih poredao a da volim ovaj resor pravde i uprave, zaista da.

U Ministarstvu pravde i uprave u oblasti pravosuđa unaprijediti efikasnost i nezavisnost i ojačati kapacitete dva najveća suda u BiH i Tužilaštva Kantona Sarajevo; ubrzati rješavanje velikog broja neriješenih predmeta, ubrzati naplatu potraživanja u izvršnom postupku posebno kod sporova male vrijednosti i neplaćenih komunalnih usluga; Vratiti građanima Kantona Sarajevo povjerenje u vladavinu prava i institucije sistema, koje će raditi na principima zakonitosti i pravičnosti i kao takve biti prepoznate od strane građana kao efikasan mehanizam zaštite njihovih prava; Intenzivirati aktivnosti na reformi javne uprave i smanjenju troškova administracije u javnom sektoru; Jačati borbu protiv korupcije u svakom segmentu društva; Redovno analizirati izvršenje odluka Ustavnih sudova i preporuka ombudsmena; Urediti lokalnu samoupravu u skladu sa Europskom poveljom o lokalnoj samoupravi, približiti je građanima i učiniti efikasnijom; Unaprijediti saradnju sa Uredom zastupnika BiH pred Europskim sudom za ljudska prava u Strazburu; Unaprijediti mjere za zaštitu imovine Kantona i ojačati kapacitete Upravnog inspektorata i Uprave za inspeksijske poslove; Kontinuirano poboljšavati položaj nacionalnih manjina i manjina svih vrsta i isključenih grupa. U oblasti komunalne privrede i infrastrukture cilj je osiguranje kontinuiranog, sigurnog i kvalitetnog pružanja komunalnih usluga kroz unapređenje rada komunalnih preduzeća; Doraditi i uskladiti propise s EU direktivama u domenu komunalnih usluga i jednakog tretmana potrošača, sa akcentom na odgovarajuće kontrole putem uvođenja i implementacije jedinstvenog informacionog sistema, što je uslov za uspostavljanje ili inoviranje tarifnih metodologija kao jednog od bazičnih mehanizama uređenja tarifne politike u komunalnoj privredi i za građane pravedniji i transparentniji sistem cijena komunalnih

usluga podložan centraliziranoj kontroli i unaprijeđenju; Unapređenje sistema poslovanja komunalnih javnih preduzeća kroz izradu šifrnika i unificiranje radnih mjesta sa istom odgovornošću u komunalnoj privredi. Nastavit će se sa rekonstrukcijom i izgradnjom vodovodnog i kanizacionog sistema radi osiguranja redovne isporuke pitke vode i smanjenja gubitaka u mreži (cilj do 10%); rješavanje problematike mulja na postrojenju otpadnih voda - Butile; rješavanje problema odvoza otpada na deponiji Smiljevići; unapređenje sistema odvoza otpada izgradnjom sistema primarne reciklaže, približavanje komunalnih usluga građanima kroz otvaranje novih centara za komunalne usluge u Novom Gradu, Starom Gradu i na Ilidži; Rješavanje isporuke toplotne energije u općini Vogošća i vodovodnog sistema Peračko vrelo; intenziviranje aktivnosti na proširenju daljinskog mjerenja (voda, gas, daljinsko grijanje); Nabavka vozila na prirodni komprimirani gas (CNG) u cilju poboljšanja kvaliteta zraka; Očistiti grad i držati ga čistim i urednim.

U oblasti prostornog uređenja, građenja i zaštite okoliša poseban akcenat u ovom resoru će biti na donošenju i uređenju postojećih propisa o prostornom uređenju i građenju, o zaštiti od zagađenja, o zaštiti od svjetlosnog onečišćenja, zelenim površinama i urbanom mobilijaru, o upravljanju zajedničkim dijelovima zgrada i dr; Unaprijediti pitanja energetske efikasnosti i utopljanja kroz povećana ulaganja i prilagodbu propisa, te pripremu i implementaciju odgovarajućih projekata; Utvrđivanje područja od posebnog i općeg interesa za Kanton Sarajevo i izrada sveobuhvatne karte Kantona sa tim zonama; Pokrenuti aktivnosti za pripremu neophodne dokumentacije i stvaranje uslova za izgradnju i rekonstrukciju značajnih kulturno-historijskih, sportskih i infrastrukturnih objekata u Kantonu Sarajevo; Ubrzavanje procesa i resorna podrška izgradnji I i IX transverzale i Južne longitudinalne i drugih prioritetnih projekata; Uspostavljanje Stručnog tijela urbanog planiranja pri ministarstvu (STUP Sarajeva); Organiziranje konferencije o Urbanom planiranju KS - Osvrt na nacrt urbanističkih planova koji su u fazi donošenja i pripreme za predstojeću izradu Prostornog plana 2023.-2043., kao i kritički rad i osvrt na postojeću situaciju u gradu, vezano za urbanizam, važeće Regulacione planove i dr.

Ministarstvo saobraćaja kroz interdisciplinarni pristup, prioritetno će se baviti unaprijeđenjem svih segmenata saobraćaja: saobraćajna infrastrukture, javnog gradskog prevoza, sigurnosti saobraćaja, mirujućeg saobraćaja, adaptivnog upravljanja saobraćajem, taxi prevoza; Fokusirati se na izgradnju novih i nastaviti već započete projekte od velikog značaja za Kanton; Krenuti u proceduru javne nabavke za izgradnju djela puta koji spaja IX transverzalu sa Lotom 2C u dužini 800 m; Usaglasiti tehničku dokumentaciju i provesti javnu nabavku za rekonstrukciju tramvajske pruge Marin Dvor - Ilidža; Riješiti imovinsko pravne odnose na dijelu Prve transverzale; Nastaviti izgradnju I dionice Prve transverzale od kružnog toka kod benzinske pumpe Gazprom do ulaza u prvi portal u sarajevskom naselju Šip u dužini od 1240 metara; Pripremiti tendersku dokumentaciju za - dionicu II, poddionica tunel Kobilja Glava u dužini 675 metara; Nastaviti izgradnju moderne saobraćajnice sa četiri trake kroz ulicu Džemala Bijedića s ciljem spajanja na V transverzalu, te Južnu longitudinalu, a spajanjem sa IX-tom transverzalom i Lotom 2C ostvariti spoj na autoput; spojiti dio neizgrađenog dijela Južne longitudinalne od raskrsnice sa ulicom Derviša Numića, do raskrsnice sa ulicom Hamdije Čemerlića, uključujući i izgradnju kružnih tokova na tim raskrsnicama te konačno riješiti pitanje izmještanja zgrade na Grbavici koja se nalazi na trasi; Nastaviti izgradnju kružnog toka kod Energoinvesta; U saradnji sa lokalnim zajednicama

unaprijediti stanje saobraćajne infrastrukture u svim općinama KS; Izvršiti sanaciju udarnih rupa i denivelisanih šahtova na putevima u KS; uraditi elaborate i ostalu tehničku dokumentaciju s ciljem otvaranja postupaka javnih nabavki za produženja isključenih traka u svrhu smanjenja gužvi u saobraćaju; Kada je riječ o Javnom gradskom prevozu, hitna analiza održavanja svih registrovanih polazaka javnog gradskog prevoza (tramvajski, trolejbuski, autobuski, minibuski saobraćaj) i reagovati promptno u skladu sa podacima koje pokaže analiza; Fokus na nabavku novih vozila u javnom gradskom prevozu; Uporedo sa navedenim raditi na sistemskom rješavanju i reorganizaciji GRAS-a; Usvojiti Strategiju i Zakon o Javnom prevozu; promptno raditi na donošenju nedostajućih podzakonskih akata Zakona o uređenju saobraćaja u KS; Nastaviti provedbu projekta elektronske naplate karata i zatvaranja tramvajskih stajališta; Uspostaviti centar za kontrolu javnog gradskog prevoza; Izraditi studiju opravdanosti uvođenja električnih vozila u javnom gradskom prevozu; Pripremiti projekat razvoja mreže električnih punionica u gradu Sarajevo za pristupnije punjenje električnih vozila; Unaprjeđivati stanje sigurnosti u saobraćaju u saradnji sa MUP-om KS i institucijama koje se bave istraživanjem saobraćaja, a za cilj postaviti „bez poginulih u saobraćaju u KS”; Pokrenuti proces javne nabavke za izgradnju G3 garaže kod Hitne pomoći i završiti radove garaže na Bjelašnici i staviti istu u funkciju; Omasoviti i ubrzati postavljanje taktilnih traka i zvučne signalizacije na raskrsnicama, u svrhu sigurnog prelaska pješачkih prelaza za slijepa i slabovidna lica; Uspostaviti adaptivno upravljanje saobraćaja na raskrsnicama sa kontrolnim centrom za praćenje; Osigurati prvenstvo prolaza tramvajskom saobraćaju na raskrsnicama; Analizirati potrebu dodatnih taksi vozila uz mogućnost odobravanja dodatnih taksi licenci, u svrhu bolje usluge i sprečavanja obavljanja nelegalnog taksi prevoza; Usvojiti izmjene i dopune Zakona o taksi prevozu da se omoguće dodatne taksi licence za vozila koja će se koristiti za osobe sa invaliditetom.

U resoru Ministarstva unutrašnjih poslova svakako treba na viši nivo podići opću sigurnost i sigurnost građana Kantona Sarajevo, kroz preventivno djelovanje i poduzimanje operativnih mjera i radnji na dostizanju zadovoljavajućeg sigurnosnog ambijenta građana i njihove imovine; Skupa sa Ministarstvom pravde i uprave, Tužiteljstvom KS i pravosuđem, istrajati i ubrzati rješavanje neriješenih slučajeva stradanja mladosti i drugih neriješenih krivičnih dijela u Kantonu Sarajevo; Unaprijediti rad policije u zajednici; Pokretanje izgradnje namjenskog objekta Ministarstva unutrašnjih poslova Kantona Sarajevo; Izmjene propisa kojima se uređuje obavljanje policijskih poslova, nabavljanju, držanju i nošenju oružja i municije, javnom okupljanju i dr.; Osnovni koncept je usmjeren na približavanje policije građanima, poboljšanje usluga, ujednačavanje standarda organizacije i rada policije KS u odnosu na standarde zemalja EU; Unapređenje međusobne komunikacije, jačanja povjerenja, povećanja subjektivnog osjećaja sigurnosti građana i njihove imovine, te stvaranja partnerskog odnosa između policije i građana u saradnji sa svim drugim akterima; Građani moraju upoznati i prepoznati „svog” policajca, a policajac se mora identificirati sa „svojom” sredinom; Odnos policije prema građanima poboljšati kroz paralelni proces unaprjeđenja odnosa unutar same policijske strukture, motivacije rada, promjene načina komunikacije i rukovođenja, kao i promjene u obrazovanju i stručnom usavršavanju; Odlučna i transparentna borba protiv svih vidova kriminala, s akcentom na borbu protiv organiziranog kriminala i korupcije, sigurnost građana i njihove imovine, sigurnost u saobraćaju i sigurnosne izazove kroz migrantsku krizu.

U oblasti Ministarstva privrede stvarati poslovni ambijent koji će dati šanse privrednim subjektima za ubrzani ekonomski rast i razvoj, zapošljavanje, povećanje konkurentnosti i

privlačenje stranih investicija; U saradnji sa Gradom Sarajevom i općinama unaprijediti funkcionisanje postojećih i ubrzati procedure za pripremu novih poslovnih zona; Posebnu pažnju posvetiti IT poduzetništvu, poljoprivredi, prehrambenoj proizvodnji, drvnoj i drveno-prerađivačkoj industriji, a posebno turizmu; Omogućiti brže i olakšane procedure za otvaranje novih firmi; u saradnji sa Udruženjem poslodavaca i Službom za zapošljavanje KS, zbog izraženih problema nedostatka pojedinih vrsta kadrova na tržištu, podržati provođenje obuka i prekvalifikacije radnika za poznatog poslodavca; donijeti planske dokumente u skladu sa Zakonom o turizmu Kantona Sarajevo i aktivno raditi na promociji i unaprjeđenju turizma kao očigledno najperspektivnije grane privrede u Kantonu Sarajevo; Aktivna promocija KS kao izvrsne destinacije za investicije; raditi na obnovi šumskog fonda i pozitivno utjecati na kvalitet zraka u KS; Podržati programe osposobljavanja mladih za osnivanje i vođenje biznisa kroz obuke za poduzetništvo; Omogućiti privrednim subjektima koji na tržištu radne snage ne mogu zadovoljiti svoje potrebe za kadrovima, da u saradnji sa Udruženjem poslodavaca i Obrtničkom komorom KS, organiziraju i prekvalifikaciju radnika za deficitarna zanimanja; Sanacija i jačanje kapaciteta za sport, turizam i rekreaciju i cjelogodišnje korištenje sportskih objekata na olimpijskim planinama na Igmanu, Bjelašnici, Zetri, Skenderiji i dr.; Izgradnja biciklističkih staza, adrenalin parka i trim staza; Uz prethodnu analizu korištenja već odobrenih poticaja, nastaviti i unaprijediti politiku poticaja u poljoprivrednoj djelatnosti; Poboljšanje uvjeta za ekološko zbrinjavanje organskog, animalnog otpada i preventivno djelovanje na zdravlje ljudi i životinja u Kantonu Sarajevo; Unaprijeđeno upravljanje i gospodarenje šumama i šumskim zemljištem; Nastavak provedbe privatizacije i konačno rješavanje privatizacijskih sporova; Rješavanje pitanja imovine iz pasivnog podbilansa; Provedba aktivnosti za intenzivnije uključenje u tekuću treću industrijsku fazu društva i paralelno sa tim se pripremati da Kanton Sarajevo i njegovi građani budu aktivni učesnici u procesu četvrte industrijske faze koja je uveliko prisutna u svijetu. U tom pravcu izgrađivati rad i kapacitete JU „Centar za napredne tehnologije” uz snažnije povezivanje sa naučnom akademskom zajednicom i to onim njenim djelom koji je aktivno uključen u projekte prije svega vezane za EU fondove.

Ministarstvo financija - Najvažniji ciljevi u resoru financija biće izrada i donošenje „Budžeta za građane”, tj. planiranje finansijskih sredstava približiti običnom čovjeku, što će utjecati na dodatnu transparentnost i efektivnost planiranja budžeta. Građani će moći lakše razumjeti koje su namjere i prioriteti Vlade u vezi sa trošenjem finansijskih sredstava poreznih obveznika. Usvojene i implementirane prakse podijeliti sa općinama i Gradom; Nastaviti sa mjerama racionalizacije javne potrošnje tokom cijelog mandatnog perioda; odluke o potrošnji javnih sredstava donositi racionalno i samo na temelju potpune opravdanosti, kako se teret za porezne obveznike u budućnosti ne bi povećavao i kako bi se stvorili preduslovi za njegovo smanjenje. Ovo se posebno odnosi na novozapošljavanje u javnom sektoru i osnivanje novih budžetskih korisnika; Zajedno sa svim resornim ministarstvima, u komunikaciji sa poslodavcima i sa resornim ministarstvom detektovati koji fiskalni i parafiskalni nameti opterećuju poslovanje privrednih subjekata i koče razvoj poduzetništva; raditi na rasterećenju privrede kroz rad radne grupe za analizu parafiskalnih nameta, te setom zakonskih rješenja ili izmjenom postojećih utjecati na smanjenje fiskalnog opterećenja privrede; Izraditi matricu fiskalnih rizika za KS što će dovesti do smanjenja netransparentnosti i do efikasnijeg upravljanja javnim finansijama u KS; unaprijediti programsko i rodno- odgovorno budžetiranje; funkcionalno i digitalno povezivanje Dokumenta okvirnog budžeta, Programa javnih investicija i Budžeta KS; osigurati nove projekte iz alternativnih izvora, kao i kontinuitet projekata u resoru Ministarstva finansija koji su započeti u mandatima prethodnih vlada.

Ministarstvo zdravstva - U resoru zdravstva, ključne aktivnosti biće : promocija zdravlja i prevencije bolesti sa posebnim naglaskom na provođenje preventivnih screening programa karcinoma dojke i colorectuma; Jačanje i unapređenje zdravstveno-informacionog sistema; Uvođenje drugog modela finansiranja u zdravstvenom sistemu; reformirati model plaćanja bolničkih zdravstvenih usluga uvođenjem drugog modela radi stvaranja poticaja za ograničavanje troškova i poboljšanje učinka davatelja usluga; povećanje uključenosti privatnoga sektora u zdravstvu i podsticanje javno-privatnoga partnerstva u pružanju zdravstvenih usluga; jačanje i unapređenje specijalističke palijativne njege - otvaranje hospicija (javno-privatno partnerstvo); Otvaranje hemodijaliznog centra (javno-privatno partnerstvo) u Općoj bolnici KS; Rješavanje prostora izolatorija za nova zarazna oboljenja i jačanje spremnosti za javnozdravstvene prijetnje; Jačanje referalnoga puta pacijenta u sistemu zdravstvene zaštite; Omogućavanje učinkovite, brze i kvalitetne nabavke lijekova i medicinskih sredstava u svim zdravstvenim ustanovama kantona i apotekama; unaprijeđeno upravljanje ljudskim resursima; Rješavanje statusnoga pitanja zdravstvenih radnika (kolektivni ugovori, reprezentativnosti profesija, regulirane profesije); Kontinuirana edukacija i obrazovanje za sve profile zdravstvenih profesionalaca; Razvijanje sistema upravljanja i održavanja zdravstvenih tehnologija i dr.

U Ministarstvu za obrazovanje, nauku i mlade u duhu kontinuiteta započetih procesa iz oblasti obrazovanja, Vlada KS ostat će dosljedna ranije usvojenim zaključcima Skupštine KS. U resoru obrazovanja sve predstavlja izazov. Naime, ovaj sektor je na marginama političkih procesa i opterećen je kozmetičkim zahvatima koji su se često, nerijetko i neopravdano, nazivali reformama. Stoga su današnja realnost rezultati Pisa testiranja, zastarjeli planovi i programi, nejasni ishodi učenja, hiperprodukcija kadra koji već odavno na biroima bilježi sve rekorde i hipoprodukcija kadra za kojim vapi realni sektor. Vrijeme je da se obrazovni sistem Kantona Sarajevo, uvede u 21. stoljeće. Neophodno je napraviti bitne, hrabre i odlučne reformske poteze kao što su: usvojiti neophodne Strategije iz oblasti obrazovanja i nauke; Usvojiti izmjene postojećih i inicirati donošenje nedostajućih propisa s ciljem stvaranja stabilnog pravnog okvira za proces reforme obrazovnog sistema; Revidirati način polaganja eksterne mature; Povećati obuhvat djece u predškolskom odgoju i obrazovanju; Pravilnik o inkluzivnom obrazovanju prilagoditi u najboljem interesu djeteta; Zaštiti interes osnivača Univerziteta u Sarajevu; U potpunosti uspostaviti Institut za razvoj preduniverzitetskog obrazovanja i fondaciju za razvoj naučno istraživačke djelatnosti; Završiti analizu nastavnih planova i programa za devetogodišnju osnovnu školu i izraditi Kurikulum Kantona Sarajevo; Povećati promociju programa koje rade karijernu orijentaciju djece i mladih u osnovnim i srednjim školama s ciljem bolje upisne politike; Razmotriti mogućnosti realizacije projekata u cilju poboljšanja zdravstvene zaštite korisnika douniverzitetskog obrazovanja; Izvršiti reviziju registra studentskih udruženja; Uspostaviti registar djece sa poteškoćama u razvoju; Omogućiti da sva djeca budu uključena u obrazovni sistem u skladu sa principima inkluzije; Formirati bazu podataka omladinskih udruženja i neformalnih grupa mladih na području Kantona Sarajevo; Promovisati politike prema mladima i programe za mlade; Unaprijediti provedbu strateških dokumenata i Zakona o mladima FBiH; Promovisati volonterizam i mobilnost mladih; Unaprijediti mobilnost mladih i sudjelovati u aktivnostima međunarodne suradnje. Vjerujem da ćete među ovim prijedlozima za oblast obrazovanja, nauke i mladih prepoznati one zaključke koje je ova Skupština jednoglasno usvojila na svojoj tematskoj sjednici.

Ministarstvo kulture i sporta - U oblasti kulture i sporta, Vlada će se koncentrisati na poticanje kulture sjećanja u raznim društveno kulturnim segmentima; Otrgnuti od zaborava i usmene predaje bosanskohercegovačku kulturu, kroz medijske prezentacije svih segmenata

kulture, u vidu art kuća filma, teatra, sarajevske škole rokenrola, književnosti, muzike i slikarstva čime će ovi sadržaji biti dostupni interaktivno i domaćoj i stranoj publici, kao i mnogobrojnim turistima; Na potezu od Holiday Inna i 'Željinog' stadiona pa do Hadžića, postoji jedna kulturološka rupa u kojoj je preko 300.000 stanovnika Kantona Sarajevo uskraćeno za adekvatne sadržaje iz područja kulture i žive u svojevrsnoj civilizacijskoj inverziji, te je cilj decentralizacija kulture kroz širenje kulturnih centara, događaja i sadržaja na područje cijelog Kantona, naročito kada su u pitanju teatar i film; Izgradnja moderne bioskopske sale ili adaptacija nekog postojećeg prostora, na području opštine Ilidža; Revizija općeg stanja domova kulture na području Kantona Sarajevo, te izrada strategije za njihovu revitalizaciju, kako sadržajnu, tako i građevinsku; Doprinos rješavanju statusa institucija Kinoteke BiH, Zemaljskog muzeja, Univerzitetske nacionalne biblioteke, Historijskog arhiva BiH i Biblioteke za slijepa i slabovidna lica, kao i rješavanje pitanja arhiva bh kinematografije; u skladu sa prestižnim statusom Sarajeva kao UNESCO-vog grada filma, Ministarstvo kulture i sporta KS planira raditi na realizaciji obaveza iz akcionog plana, a koje između ostalog podrazumijevaju i uvođenje poticaja za proizvodnju filmova i TV serija u Kantonu Sarajevo; Planiranje i priprema dokumentacije za izgradnju namjenske koncertne dvorane na području KS; Podrška muzičkom festivalu "LIVE STAGE FESTIVAL" koji je najveći muzički festival u BiH; Kada je sport u pitanju : Uvesti dodatne sportske aktivnosti kroz sportske sekcije na nivou osnovnih i srednjih škola; Započeti rad na planiranju i izgradnji manjih samoodrživih sportsko-rekreativnih bazena na području općine Vogošća, Ilijaš i Hadžići, s obzirom da je utvrđeno da veliki broj sarajevske djece spada u kategoriju neplivača; Pokrenuti aktivnosti na vraćanju bh sporta na elitnu sportsku scenu kada je u pitanju fudbal, rukomet, odbojka, stolni tenis, atletika i gimnastika; Poseban prioritet i konkretnu podršku dati povratku KK "Bosne" u elitno sportsko društvo; konkretno pomoći i ženski košarkaški klub "Željezničar", klubove sjedeće odbojke "SPID" i "Fantomi"; Podrška fudbalskom klubu "Željezničar" za nastavak izgradnje i rekonstrukcije južne tribine stadiona, s ciljem ispunjenja preduslova igranja utakmica pod pokroviteljstvom UEFA i FIFE; U suradnji sa Olimpijskim komitetom BiH raditi na razvijanju i sprovođenju strateške promocije Kantona Sarajevo kao zimskog i olimpijskog centra; Razvoj i promocija teniskog sporta, planiranje izgradnje i izrada neophodne dokumentacije za izgradnju teniskog centra koji bi nosio ime počasnog građanina grada Sarajeva, pokojnog gospodina Juan Maria Tintorea, čovjeka koji je uradio velike stvari za teniski sport u Sarajevu i po kome je nazvan i teniski turnir koji je pokrenut u Sarajevu; Izgradnja namjenske sportske dvorane za slijepa i slabovidna lica, u kojoj će se sportom moći baviti i rekreativci i profesionalci sa invaliditetom; Podržati Sportske igre mladih, koje su se pokazale kao jedan od najboljih i najkvalitetnijih sportskih projekata u posljednjih dvadeset godina u BiH.

U Ministarstvu za rad, socijalnu politiku, raseljene osobe i izbjeglice Vlada Kantona Sarajevo biće posvećena socijalnim reformama uz proaktivan pristup građanima koji su u stanju socijalne potrebe. Fokus će biti na onim građanima kantona, koji su u stvarnom stanju socijalne potrebe, uz kreiranje posebnih mjera podrške onima koji imaju mogućnosti da izađu iz takvog stanja; Nastavit ćemo realizaciju projekata izrade socijalne karte Kantona Sarajevo koja je značajna za razvoj, planiranje i izradu mjera socijalne politike i socijalne zaštite; Radit ćemo na procesima deinstitucionalizacije i transformacije ustanova socijalne zaštite čiji će štićenici živjeti u lokalnim zajednicama u ovom kantonu, a ne u zavodima zatvorenog tipa;

Kreirat ćemo zakonski okvir za razvoj socijalnog poduzetništva u Kantonu Sarajevo; Jedan od osnovnih prioriteta bit će osnaživanje i zaštita porodice pružanjem potrebne pomoći i podrške roditeljima djece sa poteškoćama u razvoju, kao i djeci u riziku iz socijalno ugroženih porodica; Unaprijedit ćemo saradnju i pružiti podršku aktivnostima institucija i udruženja iz resora socijalne zaštite, humanitarnog rada, udruženja osoba sa invaliditetom i udruženja civilnih žrtava rata; Nastavit ćemo provedbu Aneksa VII Dejtonskog mirovnog sporazuma, kroz dovršetak procesa održivog povratka i zatvaranje i posljednjeg kolektivnog centra u Kantonu Sarajevo; Pružit ćemo punu podršku institucijama Bosne i Hercegovine u rješavanju migrantske krize; Predano će se raditi na razvoju stručnih kadrova koje će moći adekvatno odgovoriti potrebama tržišta rada, kao i na stvaranju novih radnih mjesta; Pripremit ćemo posebne programe za pripravnike sa konačnim ciljem da se u narednih pet godina pripravnički staž počne odrađivati u godini diplomiranja; Posebna pažnja će se posvetiti proširenju programa sufinansiranja samozapošljavanja, Start up programima i drugim projektima za nezaposlene .

I konačno, u oblasti Ministarstva za boračka pitanja kada je u pitanju Ministarstvo za boračka pitanja akcenat će biti na mjerama i aktivnostima, koja će doprinijeti vraćanju dostojanstva svih kategorija boračke populacije, kroz kreiranje i doradu pravnog okvira i njegovu kasniju primjenu, a prije svega Zakona o izmjenama i dopunama Zakona o dopunskim pravima boraca- branitelja Bosne i Hercegovine; Uspostava registra branilaca; Izrada socijalne karte svih pripadnika boračke populacije u Kantonu Sarajevo; Priprema i sprovođenje posebnih Programa odrađivanja pripravničkog staža za djecu šehida, poginulih, umrlih i nestalih branitelja, a potom i za ostale kategorije iz reda boračke populacije; Pomoć pri ostvarivanju prava na stan u vlasništvu i na doživotno korištenje za ukupno 196 osoba iz ove kategorije koje još nisu riješile svoj stambeni problem; Kreiranje jedinstvenog protokola za obilježavanje značajnih događaja, datuma i ličnosti iz perioda odbrambeno oslobodilačkog rata 1992. - 1995.godine; U saradnji sa lokalnom zajednicom otpočeti pravne i druge aktivnosti na izgradnji centralnog spomen obilježja svim poginulim braniocima Bosne i Hercegovine iz perioda 1992. - 1995.godine sa područja Kantona Sarajevo; Unaprijediti saradnju sa boračkim udruženjima, udruženjima logoraša i dr.; Akcenat će biti na mjerama na zapošljavanju boračke populacije, kako bi omogućili da se korisnici prava što više oslanjaju na svoj rad, umjesto na programe socijalne pomoći; Raditi na kontinuiranoj pomoći u stambenom zbrinjavanju boračke populacije, ostvarujući što bolju saradnju i sa općinama po ovom pitanju; Posebna pažnja će se posvetiti očuvanju tekovina odbrambeno oslobodilačkog rata 1992. - 1995. godine.

Poštovani Predsjedavajući, dame i gospodo zastupnici, dragi građani Kantona, kao što ste imali priliku čuti, Vlada čiji Vam sastav danas predlažem, svjesna trenutka u kojem živimo, različitih izazova i prioriteta, naših sličnosti i različitosti, problema koji muče većinu građana Kantona, odlučila je krenuti vrlo hrabro i odlučno, nudeći promjene i ciljeve od kojih svi trebamo očekivati korist u narednih par godina.

U ime ove Vlade garantujem građanima da ćemo pokazati očekivanu odgovornost za javne poslove koje radimo, pri tome tražiti načine za svaku vrstu međusobnog pomirenja u svakodnevnom životu i na javnoj sceni i da ćemo izbjegavati svađalačku retoriku i pokušati graditi ljepše i mirnije okruženje za mlade generacije. Želimo uvjeriti mlade da ovdje imaju šansu, pozvati ih da tu šansu skupa razvijamo i gradimo jednu europsku budućnost, da i sami postanu akteri svoje budućnosti i time prestanu svoju jedinu priliku, vidjeti daleko od svog grada i svoje domovine !

Potrebna nam je međusobna i međugeneracijska solidarnost i razumijevanje, unaprijeđen dijalog i povezivanje uz dobrodošle različitosti na političkom polju i kroz jasne i usaglašene vizije ekonomskog razvoja i napretka, a najbolji put u tom smislu su ubrzanе europske integracije naše zemlje, pa tako i Kantona Sarajevo. A do tada, ne smijemo u to sumnjati, odličan pravac i dobar put za Kanton jeste da skupa sa nadležnim državnim institucijama, pratimo mjere i aktivnosti ili jednostavno rečeno zadaće, koje smo kao predkandidat za europske integracije i pridruženje, dobili od nadležnih europskih odbora i komisija i na čije se ispunjenje čeka kako bi smo ubrzano krenuli ka tom cilju.

Vlada će raditi na način kako smo pripremali i ovaj ekspozé : timski i na bazi iskustva i stručnih analiza, ali isto tako i dovoljno decentralizirano po ministarstvima, što će stvoriti posebnu posvećenost, međusobno takmičenje resora i ministara u postizanju postavljenih ciljeva. Istovremeno će takav način rada i ocjene rezultata, obavezati svakog ministra na posebnu odgovornost, jer će njegov rad biti transparentan i javan, građani će ga pratiti i ocjenjivati!

Vjerujem da smo kroz ekspozé jako konkretizovali naše ciljeve, a za kraj ja ću ih samo kratko ponoviti i naglasiti : Borba protiv korupcije i nulta tolerancija na korupciju; Unaprijeđenje položaja mladih; Izgradnja saobraćajnica s ciljem rješavanja gradskih saobraćajnih „čepova" i otvaranja Sarajeva prema sjevernim i zapadnim ulazima-izlazima iz Grada; Razvoj ekonomije, zapošljavanje i rješavanje nagomilanih problema u komunalnoj privredi; Kontinuirani i sistematičan rad na rješavanju problema zagađenja zraka; Obrazovanje; Zdravstvo i socijalna zaštita, posebno zaštita ranjivih kategorija stanovništva i manjina svih vrsta; Razvoj kulture i sporta; stvarna i pravna sigurnost građana Kantona.

Gore navedene i druge planirane ciljeve u mandatu ove Vlade, planiram realizirati sa timom koji svojom strukom, dosadašnjim rezultatima i iskustvom, osobnim referencama i kredibilitetom članova, garantira ispunjenje i najzahtjevnijih ciljeva i izazova u budućem radu.

U tom kontekstu dozvolite mi da kratko predstavim i Vladu. Vlada će pored premijera imati 12 ministara, od čega je troje pravnika, troje ekonomista, jedan ministar sa završenom Vojnom akademijom, jedan sa završenim Fakultetom za sport, po jedan diplomirani inženjer mašinstva, arhitekture, saobraćaja i komunikacija i arhitekture i jedan doktor medicinskih nauka. Imamo u sastavu dva doktora nauka, četiri magistra, jednog doktoranta, osobe sa velikim iskustvom i brojnim završenim specijalizacijama u struci, sa puno javnih priznanja i nagrada.

U Vladi će biti tri žene ,10 muškaraca, a po nacionalnom sastavu je 9 Bošnjaka, dva Hrvata i dvoje iz reda ostalih.

Vrlo kratko o svakom od kandidata:

Gospodin Jasmin Halebić budući ministar finansija, doktor ekonomskih nauka, bivši dekan i prodekan Ekonomskom fakultetu, bivši ministar u Vladi Kantona Sarajevo, ministar finansija naravno, sa brojnim specijalizacijama i naperdovanjima u struci.

Gospođa Mersa Kustura, diplomirana pravica sa 35 godina iskustva. Dolazi iz lokalne samouprave iz Novog Grada gdje je čitav svoj život radila na svim nivoima vlasti u lokalnoj samoupravi sa brojnim obukama i unapređenjima u struci. kandidatkinja za ministricu pravde I uprave

Gospodin Faruk Kapidžić, diplomirani arhitekta, kandidat za ministra prostornog uređenja, građenja i zaštite okoliša. Dolazi iz realnog privrednog sektora iz privatne kompanije. Naravno s ovog mjesta neću promovirati kompanije nego pojedince i članove Vlade. Završio Arhitektonski fakultet autor brojnih nagrađivanih radova iz svoje oblasti. Puno njegovih projekata išlo je u realizaciju i danas krasi Kanton Sarajevo. Zaposlen je u privatnoj firmi i tamo pored njega rade još četiri druga zaposlenika.

Gospođa Nihada Glamoč, završila Mašinski fakultet, diplomirani inženjer mašinstva. Ujedno na postdiplomskom studij na Ekonomskom fakultetu Magistra ekonomskih nauka. Čitav svoj život u javnom preduzeću „Sarajevogas“ 25 godina svoje karijere. Bila dugogodišnja direktorica Sarajevo gasa gdje je u njenom mandatu Sarajevo gas iz faze negativnog prešao u fazu pozitivnog poslovanja, jedna vrlo energična rekao bih sposobna, hrabra žena.

Adi Kalem, kandidat za ministra saobraćaja, diplomirani inženjer saobraćaja i komunikacija. Radi u jednu internacionalnu kompaniju. Upravo u resoru saobraćaja. Predsjedavajući je Općinskog vijeća u Hadžićima, voditelj i koordinator brojnih projekata od državnog značaja poput izgradnje pojedinih dionica Koridora u saobraćaju u BiH.

Gospodin Ismir Jusko, kandidat za ministra unutrašnjih poslova, aktualni ministar za boračka pitanja. Inače diplomirao i magistrirao na FASTO gdje trenutno pohađa i doktorski studij. Bio pripadnik specijalne jedinice MUP-a, radio za američki State Department u Ambasadi SAD u BiH, bio suvlasnik zaštitarske kompanije, radio u Ministarstvu sigurnosti na različitim pozicijama, bivši kantonalni ministar MUP-a, ministar prometa i komunikacija BiH, evo kao što rekoh ministar za boračka pitanja, suosnivač kluba borilačkih vještina, sportista u glavi i u duhu.

Draško Jeličić, kandidat za ministra privrede. Kolega Jeličić je završio Ekonomski fakultet. Obavljao poslove na vodećim funkcijama u privrednim društvima u Kantonu Sarajevo. Šipad, Saponia, Sarajevska pivara, Sprind i Klas, Poletu i drugim privrednim društvima. Posljednjih 10 godina radio u javnom sektoru u Federalnom ministarstvu na poslovima makroekonomskog planiranja, nakon toga je u Zajedničkim službama Vlade FBiH na poslovima koji su veoma relevantni za ono čime će se baviti ako bog da i u svom resoru.

Kolega Rusmir Mesihović, doktor Mesihović, kandidat za ministra zdravstva Rođen u Sarajevu, specijalista interne medicine, subspecijalista gastroenterohepatolog. Bio predsjednik Regionalne i BH gastroenterohepatološke koordinacije, bio šefa Klinike, gostujući profesor i pozvani predavač na međunarodnim stručnim skupovima, radio kao Generalni direktor KCUS, šefa Katedre za Internu medicinu Medicinskog fakulteta rekao sam redovni profesor. Bio ministar zdravstva u FBiH. U više mandata bio zastupnik u Federalnom parlamentu.

Gospodin Anis Krivić, kandidat za ministra obrazovanja, nauke i mladih Rođen u Sarajevu 1983. godine, gdje je završio Pravni fakultet. Tokom svoje karijere aktivni član i suosnivač različitih udruženja studenata prava i udruženja mladih. Radi u struci u javnom i privatnom

sektoru, na poslovima II-stepenog upravnog rješavanja i izrade propisa. Radio kao kantonalni prosvjetni inspektor za rad i za visoko obrazovanje, vrši inspekcijski nadzor nad radom visokoškolskih ustanova u Kantonu Sarajevo.

Gospođa Jasna Agić, kandidatkinja za ministricu za rad, socijalnu politiku, raseljena lica i izbjeglice. Diplomirani ekonomista, svoj radni vijek provela u institucijama BIH i FBIH. Trenutno obavlja poziciju pomoćnice direktora Agencije za policijsku podršku. Član šehidske porodice. Pohađala brojne međunarodne i domaće kurseve obuke za rad u javnoj upravi u menadžmentu ljudskih resursa.

Imamo također dva kandidata gđina Hajrudina Grabovicu koji je završio Vojnu akademiju, on je brigadni general OS BIH. Obnašao značajne vojne dužnosti tokom rata i nakon potpisivanja Dejtonskog mirovnog sporazuma u OS aktivan u civilnom sektoru s ciljem rješavanja unapređenja položaja statusa boračke populacije. Bio komandant zajedničke komande Vojske FBH i brigadni general od 2004 godine.

Gospodin Kenan Alikadić, pravnik magistar uprave, vijećnik Općinskog vijeća Vogošća, direktor JU KSC Vogošća. Ima bogato iskustvo bogatu sportsku karijeru, bio juniorski i seniorski reprezentativac, osvojio brojne nagrade, medalje, zahvalnice, priznanja u oblasti sporta. Bio sportista općine Vogošća za 2005, 06 i 07 godinu. Nosilac Zlatne plakete općina Vogošća.

Nakon obraćanja kandidata za premijera Kantona Sarajevo Maria Nenadića, poslovničku intervenciju imao je zastupnik Mahir Dević. Zastupnik Mahir Dević je zatražio pauzu u trajanju od 15 minuta.

NASTAVAK NAKON PAUZE u 12,25 sati

Nakon pauze, Skupštini se obratio Mario Nenadić ističući da je u predstavljanju Vlade Kantona izvršio previd po pitanju nacionalnog sastava, pa je naglasio da je sastav Vlade Kanton Sarajevo 9 Bošnjaka, 1 Hrvat i 1 Srbin i 1 Ostali.

Predsjedavajući se zahvalio kandidatu za premijera, te otvorio prostor za pitanja. Pitanja su postavili zastupnik Elmedin Konaković, zastupnik Vedran Jakupović, dopredsjedavajuća Danijela Kristić, zastupnica Neira Dizdarević, zastupnik Damir Marjanović, zastupnica Vildana Bešlija, zastupnik Elvedin Okerić, zastupnik Elvis Vreto, dopredsjedavajući Vitor Handžić, zastupnica Segmedina Srna Bajramović, zastupnica Jasna Duraković, zastupnik Damir Nikšić, zastupnik Igor Stojanović, zastupnik Samir Suljević, zastupnica Amra Junuzović- Kaljić i zastupnik Amel Mekić.

Nakon postavljenih pitanja zastupnik Konaković je intervenisao da se omogući kandidatu za premijera da pripremi odgovore na pitanja u toku pauze od 30 minuta. Predsjedavajući je predložio pauzu od sat vremena i pozvao je Skupštinu da se o pauzi izjasni. Skupština je sa 24 glasa "za" potvrdila pauzu do 14,35 sati.

NASTAVAK NAKON PAUZE

Predsjedavajući je pozvao kandidata za premijera Maria Nenadića da se obrati Skupštini i odgovori na postavljena pitanja.

Kandidat za premijera Mario Nenadić se obratio Skupštini, ističući: “Predsjedavajući, kolege, bilo je stvarno dosta pitanja, mi ćemo i kroz stenogram pokušati do svih pitanja, mada evo ja koliko sam stigao i ministri mi smo ih pohvatali, ja ću vam dati odgovor pa mogu se možda i referirati onoliko koliko sam ja i pohvatao ko je kakvo pitanje postavio. Ima dosta pitanja. Ugrubo, to je blizu 180 pitanja je postavljeno. Tako da ću ja neka koja se ponavljaju, evo naravno neću ponavljati ponovno kod osobe koja ih je eventualno postavila paralelno sa nekim prethodnikom.

Prvo na pitanja gospodina Konakovića. Vrlo otvoreno, moj stav evo da ne bude bilo kakvih dilema. Niko, apsolutno niko, bilo koji tajkun, ako je to već neka uvriježena riječ ovdje kod nas u Kantonu Sarajevo, neće imati podršku moju niti ove Vlade kada e radi o poštivanju legalnih procesa, poštivanju propisa i s te strane sigurno je da nećemo dati bilo kakav doprinos nekim negativnim ili ne daj bože, retrogradnim procesima. Što se tiče kolega koje smo spominjali, koji su bili kandidirani pa su odustajali, ja moram samo radi, evo radi digniteta nekih od njih, reći da nisu oni, mada to nije kolega Konaković čini mi se rekao, „otpadali” iz procedure, izvinjavam se, zato sam se i ogradio, nego su odustajali iz ovih ili onih razloga. Mogu detaljno odgovoriti o razlozima. Pa evo možda nije dobro obzirom da su to procesi iza nas, ali mlada kolegica koja je bila predložena za ministricu rada, socijalne politike, raseljenih osoba i izbjeglica, mlada sposobna žena, koja je vrlo otvoreno došla i nakon što je bila kandidirana rekla mi da jednostavno njen privatni biznis od trenutka kada je krenula u ovu proceduru rapidno opao, da joj porodica nije u prilici preuzeti taj biznis i sama je odustala od daljnje procedure. Kolega koji je bio kandidovan za Ministarstvo privrede također je sam odustao od kandidature kao mlad čovjek, čini mi se nije se na kraju uspio iznijeti sa pritiskom politika koje su, evo takve kakve jesu, složeni su ovo procesi. Bilo je to pitanje i stavova i ja sam to rekao i na Komisiji za izbor i imenovanje, i stavovima vezanim za Srebrenica, genocid, 9. januar i ostalo. Ja moram reći da sigurno predvodim jednu Vladu pravu pro bosanskohercegovačku Vladu i kao takvu je predstavljam i kao takvu ću je zastupati od prvog do zadnjeg dana. Ne znam da li je to u ovom trenutku važno ali sigurno da ova Vlada ne može biti dovedena u bilo kakav (nerazumljivo) sumnju vezano za Srebrenicu. Ja sam jedan od državnih činovnika koji je mogu reći najviše radio u Srebrenici, predvodio sam i radne grupe koje su rekonstruisali Srebrenicu u cjelini, obnovili tamo i to naravno znaju svi načelnici Općine Srebrenica, ja ih naravno znam svakog pojedinačno. I 11 zgrada i javnu rasvjetu i dom kulture i stadion, i sportsku. Dakle sve što je urađeno u Srebrenici tih par godina dok je Vijeće ministara obnavljalo Srebrenicu bio sam direktni sudionik i predvodio te procese, isto kao što sam predvodio povratnike prilikom povratka na područje Istočne Bosne i u druge krajeve širom, ali evo ovom prilikom se spominje Srebrenica i zato sam se referirao na ovo pitanje. Da li je jedna od trenutnih kandidatkinja za Vladu Kantona Sarajevo bila članica općinske izborne komisije? Da. Vjerovatno je određeni politički ili neki drugi kontekst. Naravno da svi koji će se eventualnim ulaskom u sastav Vlade Kantona Sarajevo naći u sukobu interesa pa su dužni podnijeti ostavke na ta mjesta. Da li neki od članova Vlade imaju neku kriminalnu ili neku drugu prošlost. Moram reći da sam ponovno, pet puta preispitao iako znam koga sam predložio, svjestan sam toga, u pauzi ponovno razgovarao sa kolegama, dobio sam decidue nedvojbene izjave da niko od njih nema nikakvu vrstu sumnjive ili ne daj bože, inkriminisane prošlosti. Vezano za progone ljekara, vezano za položaj i odnos ove Vlade prema javnim ustanovama, prema KCUS, itd. Vrlo otvoreno borit ćemo se da na svakom mjestu zaštitimo interese ove Skupštine čija smo Vlada u smislu zaštite njenih interesa, njenih suosnivačkih i drugih prava. Pa i ono kada sam govorio o prelasku gdje je god to moguće na korporativno

upravljanje, upravo to jeste jedan od modela, isto kao što je naš model biti će i kasnije pitanja, ali evo, možda je najbolje da sada prođem sada kada sam već uzeo riječ po tom pitanju da ćemo se sigurno boriti da vezano za transparentnost zapošljavanja, vezano za neke druge procese koji su u vezi sa ovim pitanjima. Uvaženi kolega Jakupović govorio je, evo prvo o pravopisnim greškama. Izvinjavam se i vama i građanima Kantona Sarajevo. Ja sam insistirao da se ovaj ekspoze, kada smo ga završili u sadržajnom smislu, ja sam insistirao da se on nađe, možda to i nije bila praksa, da se nađe ranije, da ne bude da ga dijelimo jutros pred početak sjednice, da se nađe pred vama uvaženim zastupnicima, tako da ako ima gramatičkim grešaka, a ima, ako je kompjuter na nekom mjestu nešto. Ajde da s te strane da nam to istolerišete, ja garantiram da ćemo i ovaj ekspoze lektorirati u naredni dan dva i da ćemo ga u svakom smislu sadržajno i gramatički doraditi. Bilo je upita također od kolege Jakupovića, šta podrazumijeva vladavina prava, korporativno upravljanje jel to farsa itd. Ovo maloprije kada sam rekao, ja sam uočio prilikom sastavljanja ovog eskopeza, makar onog njegovog uvodnog dijela, primijetio sam puno stvari koje ne idu u prilog ni našim upravljačkim, nadzornim ni drugim strukturama, niti su u skladu sa EU direktivama, a odnose se konkretno kada je ovo pitanje na redu, odnose se na činjenicu da mi danas imamo institucije u kojim pojedini javni činovnici, da ne govorim sada jesu li to državni službenici, namještenici ili drugi uposleni u javnom sektoru, što bi rekli, do podne rade u jednoj instituciji, a zatim poslijepodne kao članovi upravljačkih struktura odgovaraju sami sebi ili instituciji iz koje dolaze a onda da nonsens bude zaokružen, za sedam, osam ili 17 dana pojavljuju se u redovnim ili ciljanim, onim usmjerenim nadzorima u istoj toj instituciji. Evo ako je to bio upit, ili možda šire od toga- ovo je ideja da se jednostavno te nespojivosti konačno riješe. To je možda samo prvi korak u trajnom kvalitetnom rješavanju pitanja upravljačkih i drugih struktura. Nisam neki ekspert naravno u zdravstvu ali evo na prijedlog, kako je ova Skupština zadužila pa sam iskompletirao ova pitanja koja se odnose na zdravstvo i školstvo i na pojedine druge resore, uglavnom vezano za (nerazumljivo) model u zdravstvu. On je već uveden u Sloveniji, uvele su ga i neke druge, uvode se u nekim zemljama regiona. Prije pet godina Federacija je počela pod navodnicima da brine o ovom pitanju, da izdvaja za njega, tako da s te strane sigurno da je (nerazumljivo) model nešto o čemu treba ozbiljno razmišljati kada je zdravstvo u pitanju. Vezano za skrining programe, dobio sam podatke koliko je bolesnika sa karcinomom debelog crijeva, da je on povećan za 100%, da je to razlog što je ovo i neko drugo pitanje vezano za skrining u zdravstvu što je stavljeno u ovaj ekspoze. Domovi zdravlja, put pacijenta, primarna zdravstvena zaštita, evo možda u onom dijelu koji sam ja danas čitao kratko, ne mogu se ni ja sjetiti naravno, malo sam i pod stresom, međutim, detaljno evo imam ovdje pročitati ću vam kasnije, detaljno smo ovo pitanje obradili pod jednom tačkom u onom prilogu 1. našeg eskopeza. Tako da, da ima i obiteljska medicina i DZ i ta primarna zdravstvena zaštita ima detaljno obrađena. Vezano za domove kulture, evo ministar je to onako slikovito objasnio, rekao je da on je imao u vidu pet domova kulture, dakle ministar Alikadić i da je on u tri od tih pet domova i sam radio, trenirao itd. Status ustanova u kulturi, da li smanjenje ili racionalizacija zapošljavanja u javnom sektoru. Da li se odnosi na kulturu i na zdravstvo primarnu zdravstvenu zaštitu. Definitivno ne. Dakle nismo rekli nigdje da se to odnosi na bilo koji resor. Ja sam jasno rekao da je cilj staviti zapošljavanje u javnom sektoru pod kontrolu na način da ne širimo administraciju tamo gdje to nije potrebno, da izanaliziramo svugdje gdje planiramo raditi nova zapošljavanja, da prvo izanaliziramo raspoložive kapacitete i ukoliko je to potrebno što da ne, i u kulturi i u zdravstvu znamo posebno u oblasti domova zdravlja, primarne zdravstvene zaštite, i vjerujte da će to ova Vlada ukoliko bude izglasana i u prilici da će sigurno podržati. Ponavljam uz ove principe koji nisu bili usmjereni ni protiv kulture ni protiv zdravstva niti protiv bilo kog drugog resora. Jednak tretman imat će svi klubovi. Klubovi su udruženja građana u Kantonu Sarajevo. Mi to znamo 4300-4400 je udruženja registriranih, koliko se sjećam. Tako da s t strane, sva udruženja građana, svi klubovi će imati jednak tretman, posebno ako to gledamo kroz poziciju klupskih sportova i kod sportova na tim

nivoima, i omogućavanje izlazaka ovih naših klubova na europska i druga takmičenja. Gospođa Kristić dopredsjedavajuća, postavila je pitanje vezano za Zakon o ravnopravnosti polova da li je kolega Alikadić, ispred koje stranke je delegiran. Voljeli bi smo naravno da je i u našim redovima i to ćemo se boriti da popravljamo kroz daljnju strukturu, da je više kolegica i kolega dolazi SDA, tako da s te strane nije bilo dilema. Šta sam sa MUP-ovom zgradom? Zgrada MUP-a još u Vladu kojoj sam ja sjedio prije godinu i po dana sigurno je bila predmet interesovanja, tada nismo postigli rješenje. Međutim definitivno MUP, Uprava policije trebaju da imaju svoje administrativno sjedište, da se kroz tu instituciju razvijaju kapaciteti. Mi znamo da nam je danas na nekoliko lokacija u gradu da su nam ove institucije podstanari i cilj pa možda krenuti sa ledine, odnosno praviti namjenski ciljani, po standardima kakav je propisan za ovu vrstu objekata odgovarajući centar. Opet pitanja o kulturi, što ponavljam nije sporno. Da li podržavam javne konkurse. Vi znate da sam ja, možda znate da sam ja prilikom dolaska na funkciju ministra pravde i uprave 2015 godine ovoj Skupštini predložio Zakon o državnoj službi, da je to bio Zakon koji je propisao kriterije za prijem državnih službenika, eksterne i interne premještaje i druga pravila i procedure. Ukoliko bude potrebno taj ćemo Zakon doradivati i mijenjati, međutim smatram dalje u okviru državne službe zapošljavanje u drugim dijelovima javnog sektora moramo istrajati na onome što je urađeno i kroz Ured za borbu protiv korupcije. To će biti moja intencija. U okviru tog Ureda, on je uspostavljen u mandatu prethodne Vlade, ova Vlada je također uradila puno, puno na njegovom etabliranju, na profesionalizaciji tog ureda, mi ćemo tome dati punu i maksimalnu podršku kroz sve one mjere koje su išle i kroz zaključke ove Skupštine. I ono što je u Zakonu definirano. Evo ovdje sam zapisao, i u tom ćemo dijelu sigurno nastaviti politiku i mjere koju je provodila i ova i prethodne Vlade. Uostalom ako smijem to na kraju potvrditi činjenicom da sam ja prilikom, pred kraj mandata dobio i zahvalnicu Ureda jer smatram da sam tada kao resorni ministar uradio dosta na uspostavi tog ureda, na njegovom zakonskom okviru skupa sa tada gospodinom Konakovićem koji je bio premijer u toj Vladi, tako da ponosan sam na to što je urađeno u okviru Ureda za borbu protiv korupcije i tome ćemo dati puni doprinos i u nastavku. Kolegica Dizdarević pitala je kakav je stav da li je došlo do kršenja Poslovnika, pa je kasnije bilo još pitanja u vezi toga. Ja ću odgovoriti, odgovorio sam i na Komisiji za izbor i imenovanja. Pitao me tada uvaženi kolega Vibor. Ja sam to odgovorio na jednostavan način. Ja trenutno dolazim privrede, dolazim iz društva ograničene odgovornosti, društva s kojim imam potpisan ugovor. Ja se nisam kao što ste primijetili prethodna dva, tri mjeseca oglasio ni na jedan upit niti medija niti bilo koga u strukturi. Ja sam ovdje predložen za mandatar. Evo danas ponavljam sa ovog časnog mjesta, tako se i ponašam. Prema tome, onaj ko treba tumačiti skupštinske procedure neka ih tumači. Ja ne želim ni ovom prilikom ući u analizu onoga šta je rađeno, kako je rađeno, neka to rade, ako treba nadležne institucije i kao eventualno budući premijer učinit ću puno da se doradi Poslovnik Skupštine na mjestima za kao smatram da jeste odgovornost Vlade ili da Vlada treba reagirati. Da li sam stranački ili nestranački kadar? Dakle tu nema dileme, a to nikada nisam krio, ja sam kadar SBB a dolazim kao zajednički kandidat SDA, SBB i DF. Dakle tu mislim da nije bilo, možda je to onog trenutka kada sam predložen za kandidata možda je to u tom trenutku ostalo negdje da visi u zraku. Da riješimo uz ovo pitanje da riješimo i pitanje da li sam, ne znam kako je to ovdje spomenuto, kamuflaža ili kako već. Ne ja sam autohtoni sarajevski Hrvat, Bosanac i Hercegovac, ponosim se svojim porijeklom. Dakle da u javnosti ne bude nikada nikakvih dilema više oko toga. Ponavljam dakle, Sarajlija rođen u ovom gradu, Hrvat, poštujem svakog građanina Kantona, tu sam čitav, osim par privatnih i službenih putovanja, čitav život, čitav rat sam ovdje, borio se za ono za šta se bori većina u ovoj Skupštini. O tome ne dozvoljavam uopće bilo kakvu polemiku niti politiku. Dakle tu planiram živjeti. Oboje djece vezani su mi za ovaj grad, neizmjereno ga volio i čitava moja porodica. Nemam o tome šta reći i o stranačkom i o nacionalnom i o drugom porijeklu. Ali evo, možda sam trebao biti ovako jasan da se ovo pitanje više nikada ne bi polemiziralo. Svakoga to interesuje sada zna. Nisam fikus

bilo čiji. Hrvat sam. Moj interes je da moja djeca, isto kao i vaša, i svaki građanin Kantona da ima ljepšu budućnost u ovom gradu, da ima olakša pristup komunalnim i drugim uslugama. Da ima bolji pristup obrazovanju. Za oboje plaćam školovanje. Za oboje djece. Bilo je kasnije pitanja da li ćemo zapošljavati supruge ili nećemo. Moja 26 koliko je diplomirani pravnik živi i radi u privatnom sektoru. Evo ja dolazim iz privatnog sektora, bio sam prije toga u javnom sektoru, prije toga sam bio karijera mi je počela u privatnom sektoru, nemam nikoga u desetom koljenu zaposlenog u javnom sektoru. Toliko o mom stavu vezano za ovo pitanje. Bilo je dalje dosta pitanja dugovanja prema uposlenicima, vanskudske nagodbe i ostalo. Ja se dobro sjećam da smo i u tu vrijeme u resoru Ministarstva finansija i Ministarstva pravde i uprave skupa koordinirali. Napravili smo taj oblik vanskudskom poravnjanja, odnosno nagodbi vezano za presuđenu stvar, odnosno vezano za pravosnažne presude. Ako se sjećate, to smo kombinirali uz odricanje od prava na kamatu i ostalo i taj sistem dobro funkcioniše. Mi ćemo ga nastaviti i ova Vlada mu je dala doprinosa više od onog koliko je zakonski minimum tako da s te strane mi ćemo sigurno i po ovom i po svakom drugom pitanju nastaviti da realiziramo te vanskudske nagodbe. Rad sa talentovanim učenicima, hoće li ostati ta stavka, da, ona je ja sam to potvrdio kroz potvrdu i odnos prema onih 12 mjera koja ova uvažena Skupština donijela na tematskoj sjednici tako da naravno da, i na svakom mjestu gdje budemo u prilici podržat ćemo ovo je jedan od naših ključnih ciljeva isto kao i cilj ove Vlade što je bio, isto kao i ovo o čemu sam maloprije govorio, da unaprijedimo položaj mladih, sve naše djece koja planira živjeti ovdje ali i one koji planiraju živjeti negdje drugdje. Naše je da im pružimo kvalitetno obrazovanje a oni će sami izabrati i ne samo obrazovanje, zavisi to od čitavog niza drugih mjera šta će oni. Dakle rad sa talentovanim učenicima da, pojačati gdje god budemo mogli, o tome ćemo znati onog časa kada ostvarimo detaljan uvid i u budžet i šta smo tu zatekli, kakve su stavke ostale vezano za to pitanje. Dalje, bilo je još upita revizija diplome. da. Što da ne. Vidimo da se u nekim kantonima u FBiH i na nekim drugim mjestima u BiH ovo pitanje i trenutno rješava i rade analize. Postoje državne agencije koje su oformljene za realizaciju ovog posla, što da ne. Naravno postoji i Zakon o slobodi pristupa informacijama ali i o zaštiti osobnih podataka, tako da ćemo to uskladiti i evo to je nešto možda što nije bilo u ekspozeu. Ali vrlo rado što da ne u odnosu na kapacitete u radu naše buduće Vlade. Zastupnica Bešlija pitala je koje su to isključene grupe. Ja sam to pokušao u ekspozeu objasniti na način, za mene je isključen svako onaj kome nije posvećeno dovoljno pažnje. Da li se tu radi o djeci sa poteškoćama u razvoju, osobama sa invaliditetom, neki oblici nacionalnih ili bilo kojih drugih manjina, budite uvjereni da su vrata i mog ureda i resornih ministarstava otvorena. Mi smo se ovdje ne deklarativno, nego stvarno pozvali na europsku priču. Dugo godina pratim međunarodne konvencije i s te strane dobro došli. Svi koji se osjećaju manjinom po ovom gradu po bilo kom osnovu da radimo skupa i da rješavamo zajednički njihove probleme. Zastupnik Okerić je pitao odnos prema Tužilaštvu, sudovima, mjerama u borbi protiv korupcije. U mjerama u borbi protiv korupcije jasno sam rekao moje opredjeljenje vezano za rad o tome bih mogao naravno dugo govoriti, vezano za rad sudova i tužilaštava u Kantonu Sarajevo. Pa i vezano za određene procese u advokaturi, u Zavodu za besplatnu pravnu pomoć u pravobraniteljstvu itd su dosta ili dobro poznate široj javnosti jer sma puno radio na jačanju kapaciteta sudova u Kantonu Sarajevo. Mi imamo jednu jako lošu poziciju nagomilanih problema u sudovima na kantonalnom sudu, trenutno u građanskom i krivičnom odjeljenju imamo blizu 24.000 neriješenih predmeta. Želja mi je da u ovoj i do polovine naredne godine, o tome sam već razgovarao sa odgovornim osobama, da pokušamo ovaj broj svesti ispod 20.000 što bi nas vratilo u situaciju da makar pređemo na rješavanje sporova iz 2017 i 2018 godine jer nažalost još uvijek smo na 2015 i 16. što znači ako to poredimo sa problemima ili sa pitanjima koja su pokrenuta ovih dana i Federalnom parlamentu a to je pitanje izmjena Zakona o krivičnom postupku, koji kaže da je predložena jedna mjera od strane nadležnog federalnog ministra prema kome bi na godinu čekanja u trajanju sudskih procedura bila uvedena naknada nematerijalne štete od 100 KM. Ako to pomnožimo puta 20.000 i nešta hiljada sporova na

čekanju, puta toliko godina bankrotirat ćemo. Prema tome jačati kapaciteta sudova na općinskom sudu, ne želim zloupotrebjavati ovu vjersnicu, stanje tamo jako dobro poznajem. Tako da završit ću time da na općinskom sudu mi imamo preko milion sporova male vrijednosti u oblasti potraživanja za naplatu komunalnih tužbi. Tako da s te strane treba puno podrške. To ne može samo riješiti u odnosu prema sudovima, moramo djelovati i prema državnim institucijama. Imamo situaciju da sam još te 2018 godine ostavio zahtjev za prijem 11 sudaca na opštinskom sudu. VSTV to nikada nije realizirao. Prema tome trebat će nam puno, puno mudrosti, usklađenih politika i prema državnim i federalnim institucijama. Spominjali smo tamo također kada govorimo šta su to evo kada već govorimo šta su to mjere, moramo puno više sarađivati i sa uredom zastupnika za zastupanje BiH pred Europskim sudom za ljudska prava u Strazburu. Tu se krije puno izazova, opasnosti za BiH u EU integracijama, ali evo ne želim o tome ovom prilike više, osim ako me budete pitali. Opstojnost antikoruptivnih mjera. Nakon svega ovoga samo mogu reći da. Ured za borbu protiv korupcije da, uz jačanje kapaciteta, uz moju punu podršku. To ćemo dokazati već prvim danima naše saradnje. Kolegica Segmedina Srna pitala je vezano za konsultacije sa svima. Nažalost ne. Ne mogu reći ni sa većinom, ali sa nekima da, onoliko koliko je to i vrijeme i mogućnosti dozvoljavali. Ovdje u ovoj Skupštini izvan ove Skupštine sa određenim institucijama obišao sam ono koliko smo mogli u pripremi ekspozea i mislim da smo napravili jako kvalitetne konsultacije prije definisanja ovih mjera. Kako zadržati mlade. Vi ste to najbolje rekli. Na tematskim sjednicama u okviru strateških i drugih inicijativa, pratit ćemo sve ono što je dobro urađeno, također ćemo predložiti i određene dodatne mjere. Naravno mlade možemo zadržati samo kvalitetnim obrazovanjem. Blagovremenim zapošljavanjem. Pitanjem raznih stambenih, statusnih pitanja, subvencija, a znamo već praktično tu su nam, ako bude dobre volje, a ima je, tu su nam ideje i šanse zaista neograničene. Zašto sada mislim da ću biti uspješniji u ponekim. Pa evo, ako ništa, malo sam iskusniji, malo sam ozbiljniji, stariji. Nisam baš bio jako neuspješan ministar u Vladi Kantona Sarajevo. Vi se sjećate da je 18 ili 19 Zakona doneseno u ovoj Skupštini na moj prijedlog. Nikada u istoriji nigdje na svijetu nije se desilo da je svaki Zakon koji sam ja predložio Skupštini jednoglasno usvojen. To je 700. 800 puta ruka išla u zrak, nikada nije ostala na stolu. To ne govori da sam jako pametan, govori samo o tome da prilikom predlaganja bilo koje mjere da vršim detaljne konsultacije sa svima na koje se ta mjera može odnositi. Svim onim donosiocima odluka, tako da mislim da ću biti još uspješniji nakon ovih iskustava, gledao sam to evo sada nakon godinu dana i sa druge strane to je jedan od razloga što se u ovom ekspozeu često spominje taj balans između javnog i privatnog sektora, ali evo da ne uzimam puno vremena sada na ta pitanja. Kolegica Duraković je postavila čitav jedan, prvo hvala na lijepim riječima koje ste mi uputili. Postavila je čitav set pitanja koji se odnose na konkretne planove u oblasti Ministarstva za obrazovanje, nauku i mlade. I posebno na migrantsku krizu. Ja ću samo preletiti jer ne bih ovo znao tako brzo pročitati vi ćete prepoznati dosta mjera i iz onog paketa od 12 mjera i određenih tematskih sjednica koje set imali po pitanjima mladih i po pitanjima obrazovanja. Radi se o pitanju uspostave instituta za razvoj preduniverzitetskog obrazovanja. Naravno to ćemo pitanje nastaviti raspravljati, analizirati u odnosu na postojeće stanje vrlo konkretno dati svaki doprinos na njegovom rješavanju. Uspostava fondacije za razvoj naučno istraživačke djelatnosti, održati ranije zakazanu tematsku sjednicu o procesu inkluzije, završiti analizu nastavnog plana i programa za devetogodišnju osnovnu školu, pa tu ima čitav set predviđenih mjera kojima ćemo se posvetiti vezano za povratak sa devetogodišnjeg na osmogodišnje školovanje. Set mjera vezan za Okvirni Zakon. Kako je ovo pitanje uređeno u drugim zemljama u okruženju i šire pitanje reformi i ostalo, otkloniti uočene nedostatke u primjeni eksterne mature, vezano za visoko obrazovanje, naravno nastaviti integraciju sa jedne strane i očuvanje autonomije sa druge strane. Puno ćemo raditi sa OSC i drugima koji su uključeni u ova pitanja. Šta napraviti sa PISA rezultatima, evo tu ima čitav set, pet, šest mjera koje ćemo također objaviti uz ovaj ekspozee jer su iz njega i izvučene, itd. Dakle pitanje obuhvata djece u

predškolskom obrazovanju, znam da je u ovom mandatnom periodu znam da je Vlada riješila pitanja čekanja, mi tome želimo da damo svaku vrstu trajne, i sistemske, institucionalne podrške, i da osiguramo proširenje kapaciteta, tako da s te strane više nikada ne dođemo u problem sa uključivanjem djece u taj dio nastave. Da, migrantska kriza je bila jedno od pitanja, na žalost vidim ovih dana dramatičnu situaciju vezano za migrantsku krizu. O tome sam govorio malo u ekspozeu. Ovim pitanjem bavim se čitav svoj život tako da ponavljam neću zloupotrebjavati ovu govornicu, ono što sma rekao u uvodu, jedna od desetak isključivih nadležnosti institucija BIH su pitanja i migracija izbjeglica i azila, tako da ovo pitanje, ali ne, a da, to je važno kada kažemo šta ćemo to mi raditi. Dakle, politika u oblasti migracija izbjeglica i azila je nadležnost državnog nivoa. Međutim pristup pravima država nije eksteritorijalna isto kao što nije ni jedan njen Kanton . Mi smo svi dio te države i svi skupa moramo dati podršku rješavanja pitanja migracija u BIH pa i šire. Vi znate , vjerujem da znate da smo mi potpisnici brojnih međunarodnih konvencija iz oblasti migracija, iz oblasti izbjeglica, tako da naša je obaveza osigurati pristup pravima kada govorimo o pristupu na ishranu, smješta, na sigurnost tokom boravka u BIH, na pitanje socijalne zaštite, a u okviru procesa i politika koje vode državna ministarstva sigurnosti, vijeće ministara i nadležne institucije, odnos ove zemlje prema migracijama, da li je to politika nekog trajnog zbrinjavanja ili je politika zbrinjavanja na humanitarnoj, na izbjegličkoj, azilantskoj, ili drugim pitanja, priznavanje subsidijarne ili neke druge zaštite i to je nadležnost države. I tu ćemo se potruditi da ono što su obaveza Kantona ispoštujemo. Kolega Nikšić pitao je za tumačenje Poslovnika, ad hoc rješenja ili sistemske mjere. Kako to međusobno dovesti u vezu. Ja mislim da će ova Vlada naravno morati provoditi i donositi i ad hoc mjere za pitanja koja su goruća tamo, međutim ja sam veliki pobornik sistemskih rješenja, i mislim da kao što sam i rekao u ekspozeu strategije ne donose brza, ne donose jeftina, ne donose neka populistička rješenja, međutim smatram da jedino jednim strateškim zakonskim pristupom stvaranjem ambijenta i kreiranjem ciljeva sa jasno definiranim rokom da se svako pitanje može voditi ka nekom cilju ili dovršetku tako da ad hoc rješenja ili sistemska rješenja ponavljam preferiranje sistemskih i na Zakonu utemeljenih rješenja. Na pitanje šta sam htio reći da nas se ne uvlači u visoku politiku. Pa vidite, ja sam 23 ili 24 godine radio u državnim ministarstvima. Svjestan sam da ova Vlada, nismo mi nikakvi ni veliki političari, evo u najmanju ruku visoki funkcioneri ili političari ja smatram da ćemo bavljenjem visoke politike u smislu određenja prema nekim pitanjima o kojima nadležnost i obavezu brine državni nivo vlasti, entitetski nivoi, da ćemo samo sebi uskratiti priliku da se bavimo konkretnim pitanjima i interesima građana u Kantonu. Prema tome, evo ako sam nekoga povrijedimo time želio sam samo da kažem da se neću baviti nikakvom visokom politikom nego da ću svu svoju koncentraciju i pažnju skupa sa ovih 12 ljudi usmjeriti ii pokušati usmjeriti na rješavanje običnih, životnih svakodnevnih interesa građana u Kantonu Sarajevo. Dakle bez bilo kakve neodređenosti, svako pitanje što se mene tiče, ali dajte da se jednom oko toga odredim, dajte da se ne vraćam na njega svaki dan. To je bila ta poruka iz uvodnog dijela ekspozea u kojem sam ja pisao i upisao svaku riječ. Dalje je bilo zapošljavanje supruge u javnom sektoru. Hoćemo li podržati. Evo mislim da nakon što sam spomenuo mislim da nemam potrebu da ponavljam decidno tu izjavu pošto nisam podržavao ni u vrijeme kada sam bio ministar, ni upis svoje djece u školu. Ponavljam otišli su na plaćene školarine, ni zapošljavanje svoje supruge, časno, vrlo odgovorno s ove govornice pozdravljam sve i molim ih da se meni sa takvim pitanjima ne obraćaju, a argumenti su upravo ovi koje sam upravo dao. Dakle, s tim u vezi je pitanje konkursa. Podržat ću, hajmo ga raditi, hajmo ga šifrirati, hajmo raditi sve modele skupa sa Uredom za borbu protiv korupcije, to je ono na čemu ću ja sigurno dati doprinos i insistirati. Bilo je pitanje zelenila u gradu, tih općih posebnih zona, izvinjavam se. One se ne odnose na ono što smo čuli kasnije u komentarima na zaštitu, odnosno na područja od posebne zaštite, nego je to definiranje u smislu urbanog planiranja. Definiranje općih i posebnih zona u jednoj urbanoj gradskoj cjelini. Neće beton imati prednosti u odnosu na gradske parkove. Tako da evo ima tamo negdje u onim mjerama

da smo veoma decidni u tom pitanju. Da i u smislu onoga što od Sarajevo šuma tražimo kroz saradnju sa nevladinim sektorom povećanje sa 100 na 200 i na pola miliona zasađenih sadnica do kraja mandata. Bilo je kritika da se nisu spominjale, pa se to na par mjesta ponavlja pruga Marin Dvor i Ilidža. Da jeste, spomenuli smo je detaljno obrazložena i u onom prilogu dva, spomenuli smo je i u ovom dijelu, bilo bi stvarno nelogično da taj decenijski projekat ne dovedemo do kraja. Da, i ta pruga i trolejbuska mreža za Vogošću. I jedino ja nisam spominjao 20-tak transverzala nego smo baš spominjali 6. nismo se mi tu puno razmahali, znamo šta je dogovoreno sa EBRD. Moram napomenuti sa ove govornice, a to je ono što maloprije kažem, mi znamo da zaključenje novih kredita, novih međunarodnih ugovora podrazumijeva bilo da se radi o subsidijarnim ili drugim ugovorima da to podrazumijeva saradnju izvršne i zakonodavne vlasti na svim nivoima u BIH. Tako je i u RS i u FBiH i kroz Vladu jednu i drugu, i Narodnu Skupštinu i Parlament FBiH, na kraju Vijeće ministara i konačno ratifikaciju u Predsjedništvu BIH. Svjesni smo mi koliko je to trnovit put za angažiranje bilo kojeg kredita. Iskorist ćemo ovo što nam je na raspolaganju sada, i nećemo se baviti visokom politikom da ne bi smo time sebi zatvorili vrata u obezbjeđenju sredstava za rješavanje evo običnih pitanja interesa građana. Presude ustavnom suda, šta mislite s njima, kako mislite. To je jedno vrlo, vrlo složeno pitanje. Dat ćemo mu dopinos na svaki mogući način, čestitam i zahvaljujem svojoj prethodnici, kolegici Brčić koja je nastavila također rad na Zakonu o lokalnoj samoupravi, na amandmanima na Ustav Kantona da li će ih trebati provesti do kraja ili ne, hajde dajte nam da to izanaliziramo. Jedna od pitanja zbog kojih sam spomenuo presude Ustavnog suda, opet ponavljam nisu ove visoke politike, nego najobičnija pitanja vezana za lokalnu samoupravu u Kantonu Sarajevo, a to je onih 16 ili 17 presuda ako se sjećamo. A sjećamo, znam da ste o njima često ovdje govorili, prema kojima je Kanton Sarajevo povrijedio pravo lokalne zajednice na lokalnu samoupravu i ja sam na to imao akcenat kada sam govorio o tom pitanju. Korupcija nulti prioritet da, da li sam dužnik strankama. Decidno ne. Nikom ništa nisam dužan, osim ovih kredita koje imam u porodici. Dakle nikome ništa nisam dužan, tako ni strankama, ali istovremeno im se zahvaljujem što su me prepoznali kao zajedničkog kandidata i to ću ispoštovati na svaki način. Ali dužan nikom ništa nisam. Vezano za pitanje evo to je i pitanje kamuflaže, jesam li ja neka kamuflaža, ne osjećam se tako, ponosno hodam kroz svoj grad. Branio sam ga na svaki mogući načini tako će biti dok sam živ. Ne planiram, ne vidim svoju budućnost. Niti moja djeca vide budućnost igdje izvan ovog grada. Tako da ružno bih se osjećao da me neko doživljava kao kamuflažu i to su stvari o kojima najmanje volim da razgovaram u ovom gradu. Kolega Suljević je pitao realizacija ciljeva iz Ekspozea oni su okvirno utvrđeni. Mi ćemo naravno kao i svaka druga Vlada, svako drugo odgovorno tijelo, procijeniti na budžet na moguće kapacitete i ostalo, i kroz redefinisane programe rada ovo pitanje propisati na jedan prilično, nije moguće u ovakvim procesima definirati rokove ali sigurno da ćemo ovom voditi računa. I mogao bih možda s tim u vezi još reći kada govorimo o tim ciljevima iz ekspozea bilo je pitanja koliko se preklapaju. Možda se mislilo ako neko nije konkretno pitao, kolik je prepisano. Ne mogu reći prepisano, ali je ponovljeno sve ono, a ja se ne stidim toga reći, naprotiv, sve ono što je ova i svaka druga Vlada i Skupština kvalitetno uradila, mi smo to ozbiljno razmotrili. Pa nećemo valjda stvari vraćati unazad. Sve što je dobro, sve što smatramo da su dobre politike u oblasti i obrazovanja i zdravstva i socijale i boračke zaštite i ostalo, naravno da ćemo podržati. Tako ako se neka mjera podudara ponosan sam na to da smo svi skupa na istom putu i da će mjere koje mi danas ovdje predlažemo naći se u ekspozeu neke koje budu nedovršene, naći se ekspozeu, nekih budućih Vlada. Tako da s tim nemam nikakav problem. A prepisivali sigurno nismo. Bilo je dalje pitanja šta je s ovih 196 stambenih zbrinjavanja boraca, kada? Evo vidimo da je za ovu godinu predviđeno već rješavanja više od 1/4, 50 stambenih rješenja tako da možemo ako bi to išlo tom dinamikom, možemo u mandatu ove Vlade ili vezi sa tim rokom, računati da će naši branitelji, borci konačno dobiti i trajno stambeno zbrinjavanje. Pitanja obilježja na Žuči i centralno spomen obilježja, vjerujte da ćemo se o ovom pitanju maksimalno posvetiti. Već

smo u koordinaciji i komunikaciji sa općinskim načelnicima, vidjeli ste to u onom prilogu 2 projekata, da ćemo se tim pitanjima posvetiti i posebno da na jedan kvalitetan, urban način u centru grada, na Trgu Alije Izetbegovića riješimo pitanje centralnog spomen obilježja svim našim borcima i braniteljima. Bilo je također pitanja vezano za antifašističku borbu. Vjerujte da tu niko od nas nema nikakve dileme. Ja smatram upravo i zato želim vrlo jasno i odgovorno da izjavim sa ove govornice da ne želimo revidirati nikakve datume koji su već utvrđeni tokom perioda istorije nakon NOR-a i s te strane i udruženje AVNOJ i svi drugi koji temelje antifašističku borbu dobro su došli u moj ured i u bilo koji ured buduće Vlade Kantona Sarajevo. Dakle, tu vjerujte dileme nikakve nema. Zastupnica Junuzović je pitala pitanja vezano za zdravstvo, primarnu zdravstvenu zaštitu i ostalo. Evo ministar me je podsjetio ili neko od kolega izvinjavam se da je na strani 46, tačka 8) ovo pitanje detaljno razrađeno tako da nije baš da nije spomenuto. Evo rekao sam u odgovoru na prethodna pitanja da ćemo sigurno dati punu pažnju i zapošljavanju pod opet ponavljam onim uslovima maloprije, zapošljavanju u primarnoj zdravstvenoj zaštiti, DZ i svima gdje to treba, tako da obiteljska medicina i ostalo nije zapostavljena ovim ekspozeom, naprotiv. Evo rekao sam gdje je pojašnjenja. Zabrana zapošljavanja decidno ne, u smislu zabrane zapošljavanja. Nego samo analiza kapaciteta, preusmjeravanje, potpuna iskorištenost unutrašnjih kapaciteta i resursa prije nego dignemo ruku za nova zapošljavanja. Naravno gdje je to specifično pa i u zdravstvu i kulturi, naravno da se ovaj princip ne može na isti način primijeniti. Kada govorimo u kulturi imamo različita pitanja vezano za zapošljavanje, da li se to radi o institucijama kulture, u Ministarstvu i slično. Tako da s te strane sigurno ćemo praviti analize i voditi ozbiljnu politiku. Kolega Mekić pitao je za slučaj Pazarić i otvaranje dnevnih centara za djecu sa poteškoćama. Slučaj Pazarić je da baš kao što ste rekli na žalost slučaj nadležnih federalnih institucija. Znam da je to kolegi Mekiću jasno, i da nije zbog toga postavio to pitanje. Odgovornost svakoga u lancu vezano za Pazarić i za svaku drugu instituciju će biti sa naše strane podržana. Možda je ovo pitanje ostavljeno vezano za dovođenje u vezu mog trodnevnoga članstva u UO Zavoda Pazarić. Dakle ja sam bio predložen i od strane Federalne Vlade bio sam imenovan za v.d. u taj Zavod. Nikada nije urađena ta konstituirajuća sjednica. Ukupno sam bio tri, četiri dana i jedno jutro kada sam na svom računaru vidio da se roditelje djece koja su smještena u Zavod Pazarić bune zbog odluka Federalne Vlade to vam neću, rekao sam već neću s ove govornice da spominjem imena, ja sam se sam javio roditeljima djece i rekao sam smatram da je korektno da oslobodim ovo mjesto i da ga ustupim vama. Bili su protiv toga, svaka riječ koju sam ja danas ovdje izgovorio je provjerljiva. Nisu htjeli da prihvate mogu ostavku, ja sam donio tada čvrstu neopozivu odluku. Ostali smo prijatelji. Ja ću sa svake strane onoliko koliko je to moguće kroz Ministarstvo za rad, socijalnu politiku, raseljene osobe i izbjeglice i kroz druge resore pružiti podršku Pazariću, evo bez obzira što sam svega tri ili četiri dana bio član tog UO. Ovo sam imao potrebu spomenuti jer u ova dva tri mjeseca koliko se vodi polemika to je jednog ili dva pitanja s kojima se dovodim u neku netransparentnost ili neku sumnju. Tako da evo time ću, nisam planirao ali nekako mi se složilo da ću se zahvaliti i svima vama i medijima na vrlo korektnom praćenju ovoga kroz šta smo svi skupa pa tako i ja osobno prošli u prethodnom periodu. Nije bilo apsolutno ni jedna ružna, ni jedna nekorektna ni jedna neprincipijelna riječ i to je ono što sam poručio i kroz svoj ekspoze. Neću voditi svađalačku politiku prije svega nemam ni razloga i neću da time propustim šansu da uradimo nešto bolje za Kanton Sarajevo. Ja vjerujem da sam propustio ne mogu reći puno, ili možda vjerovatno jesam propustio, vi ćete i u svojim diskusijama prokomentarisati ,a mi ćemo zaista ako budemo u prilici, a možda imamo pravo čak i ovako i ako ne bude izglasana ova Vlada Kantona Sarajevo, mi ćemo zatražiti stenogram i dati iz poštovanja prema građanima i vama uvaženim zastupnicima dati detaljne odgovore i obrazloženja na svako vaše pitanje. Hvala još jednom.”

Nakon obraćanja Maria Nenadića predsjedavajući je otvorio diskusiju i prvi diskutanti su bili zastupnik Elmedin Konaković i zastupnik Damir Nikšić. Zastupnik Igor Stojanović se javio za riječ i tražio pauzu u trajanju od 30 minuta jer je kako je naveo “u međuvremenu jedan od ministara promijenio nacionalnost”.

NASTAVAK NAKON PAUZE

Predsjedavajući je obavijestio da je u toku podjela ispravke ekspozee.

Zastupnik Igor Stojanović se javio za riječ kako bi dao obrazloženje tražene pauze. Mario Nenadić je dao pojašnjenje i naglasio da je Draško Jeličić osoba koja se izjašnjava kao Srbin. Zastupnici su imali brojna pitanja, a na listi govornika našli su se zastupnik Igor Stojanović, zastupnica Jasmina Bišćević-Tokić, zastupnik Elmedin Konaković, zastupnik Igor Stojanović: zastupnica Jasna Duraković, zastupnica Segmedina Srna Bajramović, zastupnik Damir Marjanović i zastupnik Damir Nikšić.

Na zahtjev zastupnika Damira Nikšića, uslijedila je pauza od 30 minuta .

NASTAVAK NAKON PAUZE U 17,50 SATI

Zastupnik Damir Nikšić je dao obrazloženje tražene pauze: “Moram reći da sam pomalo uvrijeđen što ste rekli da zloupotrebljavam vrijeme. Ja nisam zloupotrebljavao već upotrebljavao vrijeme pauze. To je vrijeme od pola sata, umjesto tri dana koje ste nam uskratili time što ste tek jutros sa početkom sjednice, amandmanom ubacili nova dva kandidata koja evo ja i moja baza i raja na forumima povjeravamo, čitav dan od jutros. Tražio sam pauzu da bih se konsultovao i provjerio informacije koje sam morao imati vremena da provjerim protekla tri dana a nisam. Znači samo ja želim da kažem o čemu se radi. Dakle u međuvremenu smo saznali da kandidat Alikadić Kenan ima presudu od 26.01.2006 godine za nanošenje teške tjelesne povrede. Pretpostavljam da je gospodin Nenadić nije to znao kada ga je uvrstio u svoj tim. Ni ja nisam znao dok nismo provjerili.”

U nastavku sjednice, diskusije su imali zastupnik Samir Suljević, zastupnica Vildana Bešlija, Dopredsjedavajući Vibor Handžić, zastupnica Neira Dizdarević, zastupnik Vedran Jakupović i zastupnik Elmedin Konaković.

NAKON ZAKLJUČENE DISKUSIJE, PREDSJEDAVAJUĆI JE POZVAO ZASTUPNIKE I ZASTUPNICE DA PRISTUPE IZJAŠNJAVANJU O PRIJEDLOGU ODLUKE O POTVRĐIVANJU VLADE KANTONA SARAJEVO U CJELINI, U SKLADU SA ČLANOM 205. STAV 1. POSLOVNIKA SKUPŠTINE KANTONA SARAJEVO.

NAKON ELEKTRONSKOG GLASANJA KONSTATOVANO JE DA JE SKUPŠTINA (18 “ZA”, 15 “PROTIV” I 1 “SUZDRŽAN”) DONIJELA ODLUKU O POTVRĐIVANJU VLADE KANTONA SARAJEVO U SASTAVU KOJI JE I PREDLOŽEN.

Zastupnik Igor Stojanović je izrazio sumnju u glasanje i zatražio pojedinačno izjašnjavaње po ovom Prijedlogu odluke.

Sekretar po ovlaštenju Almira Kulovac Šetkić je provela pojedinačno izjašnjavaње:

1. Aljović Hamed ZA

2. Bešlija Vildana PROTIV
3. Bišćević-Tokić Jasmina ZA
4. Čampara Aljoša ZA
5. Čelik Mirza ZA
6. Ćosović-Hajdarević Samra ZA
7. Delalić Sabahudin ZA
8. Dević Mahir ZA
9. Dizdarević Neira PROTIV
10. Duraković Jasna PROTIV
11. Handžić Vibor PROTIV
12. Hasagić Amra ZA
13. Hasanović Senad ZA
14. Hodžić Admela ZA
15. Jakupović Vedran PROTIV
16. Junuzović-Kaljić Amra PROTIV
17. Kerla Bibija ZA
18. Konaković Elmedin PROTIV
19. Krstić Danijela PROTIV
20. Marić Zvonko ZA
21. Marjanović Damir PROTIV
22. Mekić Amel ODSUTAN
23. Memić Arijana PROTIV
24. Milavica Sead ZA
25. Nikšić Damir PROTIV
26. Okerić Elvedin PROTIV
27. Pecikoza Fahrudin ZA
28. Pleho Haris ZA
29. Poturak Dževad ZA
30. Srna- Bajramović Segmedina PROTIV
31. Stojanović Igor PROTIV
32. Suljević Samir PROTIV
33. Šahman Bilsena ZA
34. Viteškić Smiljana ZA
35. Vreto Elvis SUZDRŽAN

NAKON POJEDINAČNOG IZJAŠNJAVANJA KONSTATOVANO JE DA JE SKUPŠTINA (18 “ZA”, 15 “PROTIV” I 1 “SUZDRŽAN”) DONIJELA ODLUKU O POTVRĐIVANJU VLADE KANTONA SARAJEVO U SASTAVU KOJI JE I PREDLOŽEN.

U nastavku, ministrice i ministre, su pristupili davanju svečane izjave:

SVEČANA IZJAVA

„SVEČANO IZJAVLJUJEM DA ĆU POVJERENU DUŽNOST OBAVLJATI SAVJESNO, PRIDRŽAVATI SE USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO, ZALAGATI SE ZA LJUDSKA PRAVA I SLOBODE I DA ĆU U SVIM PRILIKAMA ŠTITITI INTERESE BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO I RAVNOPRAVNOST NARODA I GRAĐANA KOJI U NJIMA ŽIVE“.

Nakon davanja svečane izjave predsjedavajući se obratio članovima Vlade, čestitao im i zaželio uspjeh u budućem radu. Zatim je uslijedila kraća pauza kako bi se čestitalo novim članovima Vlade Kantona Sarajevo.

NASTAVAK NAKON PAUZE

AD – 3.

PRIJEDLOG ODLUKE O IZBORU PREDSJEDAVAJUĆIH, ZAMJENIKA PREDSJEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO

Predsjedavajući je informisao da postoji određen broj zahtjeva zastupnika, odnosno klubova, za izmjenu imena, te je predložio da se ova tačka razmatra u drugom nastavku sjednice kao prva tačka. Skupština je ovaj prijedlog prihvatila jednoglasno (29 “za”).

AD – 4.

PRIJEDLOG ODLUKE O IZMJENI ODLUKE O IMENOVANJU PREDSJEDNIKA, ZAMJENIKA PREDSJEDNIKA I ČLANOVA ODBORA ZA JAVNA PRIZNANJA SKUPŠTINE KANTONA SARAJEVO

Prijedlog su zastupnici i zastupnice dobili/e u dopunskom materijalu.

S OBZIROM DA NIJE BILO PRIJAVLJENIH ZA PITANJA ILI DISKUSIJU, PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE O PRIJEDLOGU ODLUKE O IZMJENI ODLUKE O IMENOVANJU PREDSJEDNIKA, ZAMJENIKA PREDSJEDNIKA I ČLANOVA ODBORA ZA JAVNA PRIZNANJA SKUPŠTINE KANTONA SARAJEVO.

NAKON GLASANJA KONSTATOVANO JE DA JE SKUPŠTINA (28 “ZA”, I 1 SUZDRŽAN”) DONIJELA OVU ODLUKU.

Predsjedavajući je podsjetio da se na dnevnom redu nalazi Prijedlog budžeta Kantona Sarajevo kao sljedeća tačka dnevnog reda, a s obzirom na novoformiranu Vladu, i davanje mogućnosti amandmanskog djelovanja, predložio je prekidanje sjednice.

Uz konsultacije sa rukovodstvom Skupštine, predsjedavajući je prekinuo sjednicu 22. sjednicu Skupštine Kantona Sarajevo uz obavijest da će se nastavk održati u najkraćem mogućem roku.

Zapisnik izradila:

Jasminka Deliahmetović

Po ovlaštenju

S E K R E T A R
A J U Ć I

SKUPŠTINE KANTONA SARAJEVO
SARAJEVO

Almira Kulovac Šetkić, dipl. Pravnik

P R E D S J E D A V

SKUPŠTINE KANTONA

Dr. Mirza Čelik

ZAPISNIK SA
NASTAVKA 22. RADNE SJEDNICE SKUPŠTINE KANTONA SARAJEVO
ODRŽANE 11.03.2020.GODINE

Predsjedavajući Mirza Čelik (u daljem tekstu: Predsjedavajući) je pozdravio sve prisutne i otvorio nastavak 22. Radne sjednice Skupštine Kantona Sarajevo.

/HIMNA/

Prema evidenciji Službe, sjednici prisustvuje 34 zastupnika i zastupnica, što je dovoljan broj za punovažan rad i odlučivanje.

Izostanak sa ove sjednice opravdala je zastupnica Memić Arijana.

Sjednici su prisustvovali/le zastupnici/zastupnice:

SDA - STRANKA DEMOKRATSKE AKCIJE

1. Hamed Aljović
2. Jasmina Bišćević-Tokić
3. Samra Ćosović-Hajdarević
4. Aljoša Čampara
5. Mirza Čelik
6. Sabahudin Delalić
7. Mahir Dević
8. Amra Hasagić
9. Admela Hodžić
10. Smiljana Viteškić

POLITIČKA ORGANIZACIJA "NAROD I PRAVDA"

1. Vedran Jakupović
2. Elmedin Konaković
3. Danijela Kristić
4. Amel Mekić
5. Elvedin Okerić

POLITIČKA ORGANIZACIJA GRAĐANA "NAŠA STRANKA"

1. Vildana Bešlija
2. Neira Dizdarević
3. Vitor Handžić

SOCIJALDEMOKRATSKA PARTIJA BOSNE I HERCEGOVINE

1. Segmedina Bajramović Srna
2. Igor Stojanović

3. Samir Suljević

SAVEZ ZA BOLJU BUDUĆNOST BIH – FAHRUDIN RADONČIĆ

1. Zvonko Marić
2. Dževad Poturak
3. Bilsena Šahman

DEMOKRATSKA FRONTA

1. Senad Hasanović
2. Bibija Kerla
3. Sead Milavica

NEZAVISNA BOSANSKOHERCEGOVAČKA LISTA

1. Amra Junuzović-Kaljić

BOSS-BOSANSKA STRANKA – MIRNES AJANOVIĆ

1. Haris Pleho

SAMOSTALNI ZASTUPNICI/ZASTUPNICE:

1. Damir Nikšić
2. Fahrudin Pecikoza
3. Damir Marjanović
4. Elvis Vreto
5. Jasna Duraković

Na samom početku zasjedanja, Skupština je odala počast učenje fatihe i minutom šutnje akademiku Muhamedu Filipoviću i preminulom Svetozaru Pudariću, ranijem zamjeniku predsjedavajućeg Skupštine Kantona Sarajevo u mandatu 2006-2010.godina.

Predsjedavajući je podsjetio da su za nastavak 22. Radne sjednice preostale sljedeće tačke:

3. Prijedlog odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
5. Prijedlog budžeta Kantona Sarajevo za 2020. godinu;
6. Prijedlog zakona o izvršavanju Budžeta Kantona Sarajevo za 2020. godinu
7. Prijedlog zakona o kažnjavanju govora mržnje Kantona Sarajevo - skraćeni postupak;
8. Prijedlog odluke o davanju saglasnosti na Finansijski plan Javne ustanove „Služba za zapošljavanje Kantona Sarajevo“ Sarajevo za 2020. godinu sa Odlukom o izvršavanju Finansijskog plana Javne ustanove „Služba za zapošljavanje Kantona Sarajevo“ Sarajevo za 2020. godinu;
1. Poslanička/zastupnička pitanja, inicijative i odgovori.

Zastupnik Zvonko Marić se javio za riječ naglasivši da bi bilo potrebno da Krizni štab izvjesti Skupštinu o stanju vezano za korona virus. Nakon zastupnika Marića još su reagovali i

zastupnik Aljoša Čampara, zastupnica Amra Junuzović Kaljić i zastupnik Elmedin Konaković.

Nakon intervencija određenih zastupnika uslijedila je pauza u radu Skupštine.

NASTAVAK NAKON PAUZE

Nakon pauze predsjedavajući je informisao da je Kolegij na kratkoj sjednici dogovorio da se stavi na glasanje prijedlog da se tačka “Zastupnička pitanja i inicijative i odgovori” razmatra kao prva tačka dnevnog reda na današnjem nastavku sjednice. **PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE I NAKON GLASANJA KONSTATOVANO JE DA ĆE SE PRVA RAZMATRATI TAČKA “ZASTUPNIČKA PITANJA I INICIJATIVE I ODGOVORI.**

AD-1.

POSLANIČKA/ZASTUPNIČKA PITANJA, INICIJATIVE I ODGOVORI

Prvi prijavljeni je bio zastupnik Samir Suljević i on je podnio sljedeće: “Imam jedan zaključak i jedno zastupničko pitanje. Zaključak o kojem bi želio da se Skupština izjasni. Vezan je za zaključak donesen je 25.02. na istoj ovoj Skupštini znači na svojoj 21. sjednici. Dana 25.02.2020 godine na 21. sjednici Skupština Kantona Sarajevo donijela je zaključak kojim se zabranjuje zapošljavanje državnih službenika u aktuelnom sazivu Vlade Kantona Sarajevo, JP i institucije koje se finansiraju iz budžeta Kantona Sarajevo. Doneseni zaključak je nezakonit, štetan i u cjelosti pravno neprovodiv. Isti je u suprotnosti sa odredbama Zakona o radu, kao lex specialis propisa iz nadležnosti FBiH, kao i Uredbom o postupku prijema u radni odnos u zavodima, agencijama, direkcijama, i upravnim organizacijama. Pravnim licima sa javnim ovlaštenjima na teritoriji Kantona, Grada, općina u JU i JP čiji su osnivači Kanton; Grad ili općina te u privrednim društvima u kojima Grad, Kanton, Općina učestvuju sa više od 50% ukupnog kapitala. Pravno je neupitno da je zaključak Skupštine nezakonit, neprovodiv i štetan po budžet Kantona Sarajevo, da stvara pravnu anarhiju i pravnu nesigurnost u Kantonu Sarajevo, te se kao takav mora hitno staviti van snage i u skladu s navedenim predlažem da se donese zaključak o stavljanju van snage zaključka Skupštine Kantona Sarajevo sa 21 sjednice Skupštine Kantona Sarajevo održane 25.02. kojim se zabranjuje zapošljavanje u JP i institucije koje se finansiraju iz budžeta Kantona Sarajevo. Moram pročitati obrazloženje: odredbe predmetnog zaključka Skupštine Kantona Sarajevo direktno su u suprotnosti sa članom 15. naprijed navedene Uredbe koja glasi: „ Član 15. Nakon oglašavanja javni oglas se ne može poništiti. 2. Izuzetno od stava ovog člana javni oglas se može poništiti u sljedećim uslovima, ako dođe do promjene odgovornog lica u poslodavcu koji je raspisao javni konkursa. Ovaj zaključak je izuzetno štetan. Dostavit ću u pisanoj formi. I zastupničko pitanje koje ću dostaviti u pisanoj formi to je vezano za Apoteke Sarajevo i zaštitne maske od korona virusa, zašto se prodaju po 7 KM a realna cijena je 30 feninga. Hvala.”

Zastupnik Amel Mekić je podnio sljedeće: “Imat ću dvije inicijative. Prva je Ministarstvo za obrazovanje, nauku i mlade Kantona Sarajevo. Pokrećem inicijativu da se na adekvatnoj lokaciji napravi Univerzitetska čitaonica i studentska menza. Druga inicijativa Ministarstvo zdravstva Kantona Sarajevo. Pokrećem inicijativu za uvođenje patronažne službe u okviru sadašnje primarne zdravstvene zaštite kako bi unaprijedili zdravstvenu oblast a potrebe građana za optimalnom zdravstvenom zaštitom doveli na zadovoljavajući nivo. Efikasan i

uspješan sistem zdravstvene zaštite može biti samo kroz razvoj njene primarne zdravstvene zaštite, prema potrebama njenih građana.

Detaljna objašnjenja ću dostaviti u pisanoj formi za obje inicijative. Pošto imamo jako malo vremena, postavio bih sljedeća pitanja za ministara Mesihovića zbog novonastale situacije a vezano za korona virus.

Prvo pitanje, da li uposlenici u primarnoj zaštiti imaju odgovarajuću zaštitu, odnosno odgovarajuće maske sa navedenim vremenom zaštite, zaštitne naočale, kaljače i itd.

Drugo pitanje, koliko je raspoloživo kreveta u izolatoriju i koji broj respiratora imamo u pripremi? Da li se vrši dodatna dezinfekcija zdravstvenih ustanova? Gdje su izvršene dezinfekcije u javnim prostorima i na koji način i koja vrsta dezinfekcije? Da li je pojačan nadzor u školskim ustanovama sa svim preporučenim mjerama i da li je krizni štab u kontaktu sa privatnim zdravstvenim sektorom i da li je neko iz privatnog sektora uključen u krizni štab?

Još također želim da napomenem da imamo veliki broj migranata koji su i te kako opasnost za širenje bolesti. Interesuje me da li su resorna Ministarstva pregovarala i dogovarali na koji način će se liječiti isti i ako dođe do velike pandemije, kako ćemo ih staviti u izolaciju? Toliko od mene hvala vam.”

Zastupnik Zvonko Marić je podnio sljedeće (citiramo): “Ja sam već postavio pitanje i nadam se da će se resorni ministar obratiti, neko iz kriznog štaba i ministar obrazovanja i ako ima potrebe i neki od ministara ili premijer. Pitanja ostaju ista, da ih ne ponavljam međutim puno je razloga da govorimo o ovome jer sam čuo u onim našim konsultacijama tokom njih da je zabranjeno okupljanje više od tri sata i da ovaj skup ne treba biti duži. Ali učenici su po 6 sati u školama i također te škole u prirodi organiziraju se na svakom koraku i bojim se da nisu bog zna kakvi uvjeti. OŠ „Osman Nuri Hadžić” priprema školu u prirodi vezano za Bjelašnicu. Kažu da su tamo higijenski uslovi katastrofalni i možda da neko ko organizira to ode i izvidi stanje kakvo je stanje u tom mjestu gdje će boraviti učenici. Moje zastupničko pitanje se odnosi konkretno, neću obrazlagati, zašto su u novi urbanističkom planu dovedeni u pitanje olimpijski objekat na Velikom polju Igman za koje KJP ZOI'84 posjeduje pravosnažne upotrebne dozvole, građevinsko urbanističku saglasnost, a to su streljište, startno ciljni prostor, startni objekat, sistem za vještačko osnježavanje sa akumulacijom, tehnička baza, sanitarije, javni wc, mostovi na stazama itd. Da li je prilikom izrade nacrtu urbanističkog plana za Veliko polje ispoštovana procedura koja je zakonom propisana s obzirom na važnost projekta u smislu prostora koji obuhvata, to je 37,5 hektara i na koncu zašto su prilikom izrade nacrtu urbanističkog plana za Veliko polje nisu ispoštovane smjernice koje je usvojilo Opštinsko vijeće Hadžići u svojoj odluci o pristupanju, izradi urbanističkog projekta Igman Veliko polje koja je objavljena u službenim novima Kantona Sarajevo 10.08.2017 godine. Ne bih dalje, zahvaljujem na ukazanom vremenu da postavimo ova pitanja. Hvala.”

Zastupnica Neira Dizdarević je podnijela sljedeće (citiramo): “Vezano za trenutnu situaciju po pitanju koronavirusa imam jedno pitanje s obzirom da sam dobila veliki broj upita od roditelja čija djeca pohađaju školske ustanove. Predškolske ustanove mahom traže da se do kraja mjeseca marta u skladu sa ugovorima o pružanju usluga predškolskog odgoja dostave ljekarska uvjerenja za mališane odnosno brisevi grla i nosa. Međutim znamo da je među prvim preporukama da se u DZ odlazi isključivo u slučaju prijeke potrebe. Pa molim ministra da možda na neki način se ovaj dio iskomunicira sa predškolskim ustanovama, kako javnim tako i privatnim. Odnosno da se roditeljima daju direktive na koji način postupati jer odlazak s mališanima u DZ je zasigurno sada potpuno neprihvatljiv. Samim time ukoliko sami roditelji odu sa recimo nalazima briseva po ljekarsko uvjerenje ipak se izlažu prisutnosti virusa u čekaonicama. Drugo pitanje koje nije vezano konkretno za zdravstvo i koronavirus ali koji zaista moram uputiti zbog alarmantne situacije koja je prisutna iz godine u godinu i koja je

rekla bih poraz za sve nas ovdje kako u Skupštini tako i u vladama, jeste pitanje mališana koji pohađaju nastavu po EDUS programu. Molim ministra obrazovanja za usmeni odgovor da li je upoznat sa situacijom i upućujem inicijativu da se odmah poduzmu sve aktivnosti koje su potrebne da djeca iz spektra koji pohađaju EDUS program u Centru Vladimir Nazor otpočnu s nastavom. Svaki sat rada koji je izgubljen za ovu djecu predstavlja veliku regresiju i ustvari poništava sate i sate rada. Imam još jedan zaključak koji je potrebno da se Skupština izjasni, ali ću ga dostaviti predsjedavajućem pa na kraju možete zbog stenograma pročitati i zamolit ću da se zastupnici i zastupnice izjasne o istom. Hvala.”

Zastupnica Jasmina Bišćević Tokić je podnijela sljedeće (citiramo): ”Ja sam na prošloj sjednici delegirala jedan zaključak koji je Skupština kantona usvojila 25.02. međutim tražim dopunu tog zaključka iz razloga manjka radnika i ukazane potrebe prema građanima Kantona Sarajevo u sljedećim kategorijama, i predlažem da u prvom dijelu zaključka usvojimo da se izuzetno od zabrane iz prethodnog stava izuzimaju odgojne , obrazovane, zdravstvene ustanove, za hitna i opravdana zapošljavanja, kao i upošljavanja pripravnika i djece šehida, poginulih boraca, kroz realizaciju programa, kao i sve ostale programe zapošljavanja kod nadležnih službi za zapošljavanje uz obaveznu prethodnu saglasnost vlade Kantona Sarajevo. Ostali svi stavovi iz Zaključka ostaju na snazi. I evo dala sam zaključak kako bi se mogla Skupština Kantona Sarajevo o tome izjasniti. Zahvaljujem.”

Zastupnik Damir Marjanović je podnio sljedeće (citiramo): “Evo da budemo efikasni zatražit ću od ministra za obrazovanje, nauku i mlade Kantona Sarajevo da hitno prikupi informacije iz svih osnovnih i srednjih škola da provjeri da li su ispoštovane odluke i preporuke kriznog štaba koje su date prije mjesec dana vezano za sprječavanje širenja koronavirusa. Posebno to govorim i mislim vezano za obezbjeđivanje sredstava za dezinfekciju. Normalno vjerujem da ćemo danas dobiti mnogo šire odgovore i kakve su ideje o tome da li da se nastava treba obustaviti ili ne treba obustaviti, ali to ću stvarno prepustiti stručnjacima da govore. I druga stvar vezano je za vrlo sličan zaključak koji je kolegica Bišćević predložila, dobrim dijelom se slažem s ovim zaključkom, ako zaključak gospodina Suljevića ne prođe, s tim što bih proširio ovaj zaključak jedan, mislim da je kolegica Bišćević mislila na tome, ovdje se govori o odgojno obrazovnim ustanovama, da ne bi bilo nedoumice, postoje visoko – škole ustanove koje bi trebali isključiti iz ove priče. Pa ako se kolegica Bišćević slaže da se proširi ovaj zaključak na visoko škole ustanove, onda ne bih davao na glasanje nešto odvojeno. Hvala.”

Zastupnik Vedran Jakupović je podnio sljedeće (citiramo): “Obzirom da ulazimo već u naredne faze, mislim da je neko od kolega postavio, zna li se tačan broj respiratora koji posjedujemo u Kantonu Sarajevo? Na kojim klinikama? To je znači usmeni odgovor u Ministarstvu zdravstva. I evo složit ću se sa kolegom Marjanovićem, vidim da su u prostorijama kantona već postavljena neka sredstva za dezinfekciju, da li je i šta je urađeno po tom pitanju u školskim ustanovama od predškolskog do visokog obrazovanja? Govorim čisto o sredstvima za dezinfekciju, pošto znamo da ta sredstva su veliki problem i da idu što kažu na mišiće i najosnovnija sredstva za higijenu u ovim ustanovama. Evo imamo ovu preporuku za skupove od 250 ili više učesnika, da se ne održavaju i zanima me mišljenje posebno direktorice Pilav da li bi trebalo sve skupove zabraniti. Sada da li je 250 ili 50 ili je 30, koja je tu razlika? I da ponovim još jednom za osnovne škole, neko je od kolega pitao, kakav je plan Ministarstva obrazovanja za prekid nastave? Hvala.”

Zastupnica Segmedina Srna Bajramović je podnijela sljedeće (citiramo): “Budući da od Zavoda zdravstvenog osiguranja nisam dobila odgovor na svoje zastupničko pitanje koje sam pokrenula na 14. Radnoj sjednici Skupštine Kantona Sarajevo izražavam svoje nezadovoljstvo i pitanje ponovno upućujem. Molim ZZO Kantona Sarajevo da mi dostavi

podatke o broju izvršenih kontrola od 2018. do danas na osnovu člana 21. Ugovora o pružanju zdravstvene zaštite osiguranim licima Kantona Sarajevo potpisanim sa KCUS i Općom bolnicom „Prim.dr. Abdulah Nakaš“ kao i informacije o utvrđenom stanju te kopije akata tih kontrola. Također molim Ministarstvo zdravstva da me obavijesti o poduzetim aktivnostima u rješavanju i definisanju puta pacijenta u sistemu zdravstvene zaštite Kantona Sarajevo. I vezano za ovo o čemu je već govorila kolegica Dizdarević imam potrebu postaviti još neka pitanja. Dakle djeca s poteškoćama u razvoju uključena u predškolski program u okviru Centra Vladimir Nazor njih 80, od prošlog polugodišta i 40 na listi čekanja, dakle oko 120 ni nakon više od mjesec dana od početka drugog polugodišta još uvijek nisu krenula u svoju školu u vrtić u kojem se radi po eksperimentalnom programu Edusa. Kada se uzme u obzir ogromna šteta koja se ovoj djeci čini svakim danom koju provedu u kući umjesto u školi, postavljam pitanja: kakav je njihov status trenutno, tj kada možemo očekivati da će se krenuti sa radom? Kako je program rada već odobren od Ministarstva obrazovanja i nauke Kantona Sarajevo te izvršen transfer neophodnih sredstava u ustanovu Centar Vladimir Nazor, a u Edusu i dalje spremni da nastave sa vođenjem programa, da li je ova veoma duga pauza koja je postala već poslovnička na početku svakog polugodišta bila neophodna i ovaj put i ko je za nju odgovoran, tj ko će snositi posljedice za štetu nanесenu djeci? Da li je istina medijska informacija kako je postojao veto na prijem uposlenika u Centru Vladimir Nazor, te ako jeste, molim da mi se dostavi obrazloženje osnove istog u skladu sa standardima, zakonima i interesima djece. I za kraj, kako je prva vijest oko tranzicije vlasti bila kako je ukraden fejsbuk profil Vlade, molim pojašnjenje zašto je novi saziv Vlade Kantona Sarajevo nastavio koristiti Fejsbuk profil Vlade Kantona Sarajevo koji je prema mišljenju državne službenice i zastupnice u Skupštini Kantona Sarajevo vlasništvo britanske ambasade, te predstavlja navodni udar na suverenitet države, ili je pak istina potpuno drugačija. Zamolit ću pojašnjenje vezano uz ovo pitanje. Hvala.”

Zastupnica Bilsne Šahman je podnijela sljedeće (citiramo): ”Prvo pitanje Ministarstvu za rad i socijalnu politiku da li su prioritetno zaštititi ustanove socijalne zaštite i kao mjere prevencije od koronavirusa i da nam u roku od sedam dana pošalju potvrdu šta su uradili po tom pitanju. Ministarstvu saobraćaja pitanje usmeni odgovor tražim, da li se radi dezinfekcija vozila na dnevnoj bazi i u koliko ne, zašto? Ministarstvu unutrašnjih poslova postavljam pitanje i tražim također usmeni odgovor da nam da informaciju o 500 novih migranata koji su jutros prebačeni iz Tuče u Sarajevo. I na kraju, premijeru i Vladi kantona da i u ovoj zgradi postave sredstva za dezinfekciju, jer znamo da kroz ovu zgradu svakodnevno prođe stotine ljude, da krenemo od nas. Zahvaljujem.”

Zastupnik Damir Nikšić je podnio sljedeće (citiramo): “Ja sam htio postaviti ista pitanja vrlo slična pitanja kao kolegica Neira i Srna Bajramović. Tako da nemam trenutno ništa, samo bih htio da evo zamolim da što prije krenemo na ove izvještaje kriznog štaba i ministra da počnemo pričati o koronavirusu. Hvala.”

Zastupnik Dževad Poturak je podnio sljedeće (citiramo): “Za danas imam dva pitanja i jednu inicijativu. Prvo pitanje se odnosi na Ministarstvo obrazovanja, nauke i mladih. Koliko je potrebno vremena da se uspostavi on-line nastava i koji je rizik ako se to uspostavi uopšte on-line nastava i koji je rizik po nastavu. I s druge strane imamo zabranu skupova, a djeca nam idu u školu, što mislim da je to malo kontradiktorno. To treba nekako vidjeti da se to usaglasi da djeca idu u školu preko on line nastave. Drugo pitanje za premijera. Gospodine premijeru, vi ste u vašem ekspozeu najavili posebnu brigu oko mladih. Možete li nam reći šta ste u ovih četiri, pet dana uspjeli uraditi za našu mladost, za našu omladinu u Kantonu Sarajevo? Odgovor nam dostavite u pisanoj formi. Treća inicijativa za ministarstvo saobraćaja. Tražim

od ministra saobraćaja da u narednom periodu se vozila, javnog saobraćaj, održavaju čiste svaki dan umjesto svakih sedam dana zbog upravo ovog koronavirusa. Zahvaljujem.”

Zastupnica Vildana Bešlija je podnijela sljedeće (citiramo): ”Pretpostavljam da je veliko interesovanje i očekuju od nas konkretnije neke i odluke zbog evo situacije, ljudi su uplašeni vjerovatno zbog korone virusa i imamo li adekvatne mjere. S tim u vezi ja bih uputila pitanje prema vladi Kantona Sarajevo ministarstvu zdravstva i Ministarstvu obrazovanja, da povodom epidemije korona virusa koja je zahvatila BIH, to je već izvjesno i uzimajući u obzir preporuke zdravstvenog savjeta Naše stranke, pozivam Vladu, Ministarstvo obrazovanja i Ministarstvo zdravstva ad pristupi višem stepenu preventivnih mjera. Naravno da nema mjesta panici ali ima mjesta za oprez i adekvatnu preventivu. I zato molim da ozbiljno razmotrite obustavu nastave u svim obrazovnim institucijama u Kantonu Sarajevo, i ovim povodom date usmeno obrazloženje. Sve ostale inicijative ću dostaviti u pisanoj formi. Hvala.”

Dopredsjedavajuća Danijela Kristić je podnijela sljedeće (citiramo): ”Ja ću imati jedno samo usmeno pitanje za ministricu Glamoč, da li ćete izvršiti pritisak na Vladu FBiH da zbog naglog pada cijena nafte i naftnih derivata hitno smanji cijenu gasa u skladu sa članom 31 Uredbe o organizaciji i regulaciji sektora plinskog gospodarstva. Usmeni odgovor. I za ministra zdravstva imam tri kratka pitanja. Prvo je, ukoliko oboli zdravstveni radnik a nije imao sve za zaštitu na radu, ko snosi odgovornost? Ko vrši dezinfekciju velikih tržnih centara BBI, SCC, Bingo? I dali škole imaju dovoljne količine tečnog sapuna i dezificijensa za ruke i šta planiraju za zaštitu učenika? Toliko.”

Nakon postavljenih pitanja predsjedavajući je dao pauzu od 5 minuta kako bi se klubovi dogovorili vezano za zaključke.

NASTAVAK NAKON PAUZE

Nakon pauze, predsjedavajući je pozvao ministre i ministrice da daju odgovore na pitanja za koje je tražen usmeni odgovor. Prvi koji je dao odgovore bio je ministar zdravstva Rusmir Mesihović, zatim direktorica Zavoda za javno zdravstvo Aida Pilav, pa ministar za obrazovanje, nauku i mlade Anes Krivić. Dodatna pitanja imali su zastupnik Vedran Jakupović, zastupnik Zvonko Marić, zastupnik Damir Nikšić, zastupnica Amra Junuzović Kaljić, zastupnik Damir Marjanović, zastupnica Bilsena Šahman, zastupnik Amel Mekić, zastupnik Dževad Poturak, dopredsjedavajuća Danijela Kristić, zastupnik Elmedin Konaković.

U nastavku sjednice Skupštini su se obratili ministar unutrašnjih poslova Ismir Jusko, zatim ministrica komunalne privrede i infrastrukture Nihada Glamoč, ministar saobraćaja Kalem Adi i direktorica JU Zavoda za javno zdravstvo KS Aida Pilav.

Nakon obraćanja ministara uslijedilo je izjašnjavanje po predloženim zaključcima.

Prvi zaključak zastupnice Neire Dizdarević:

1. Obavezuju se sva pravna lica i fizička lica na području Kantona Sarajevo koji u svojoj djelatnosti imaju emisiju zagađujućih materijala u zraku, postrojenja za sagorijevanje, tehnološka postrojenja i privredni subjekti koji imaju emisiju u zrak da u roku od mjesec dana dostave potrebne podatke za listu pravnih i fizičkih lica na koje se odnosi plan, koji su obavezni primjenjivati odredbe plana u skladu sa odlukom o zaštiti i poboljšanju kvaliteta zraka u Kantonu Sarajevo.

2. Obavezuje se Ministarstvo prostornog uređenja, građenja i zaštite okoliša da navedene zaključke objavi na svojoj web stranici.

PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE O PREDLOŽENIM ZAKLJUČCIMA. ZASTUPNICI I ZASTUPNICE SU PRISTUPILI/E GLASANJU I NAKON GLASANJA KONSTATOVANO JE DA JE SKUPŠTINA JEDNOGLASNO (25 “ZA”) DONIJELA ZAKLJUČKE KAKO SU I PREDLOŽENI.

Zastupnica Jasmina Bišćević – Tokić je tražila dopunu Zaključka koji je usvojen 25.02. i to sljedećim „Izuzetno od zabrane iz prethodnog stava izuzimaju se odgojno obrazovne i visokoškolske ustanove, kao i zdravstvene ustanove za hitna i opravdana zapošljavanja, kao i upošljavanje pripadnika i djece šehida i poginulih boraca kroz realizaciju programa, kao i sve ostale programe zapošljavanja kod nadležnih službi za zapošljavanje uz obaveznu prethodnu saglasnost Vlade Kantona Sarajevo,“

PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE O PREDLOŽENOJ DOPUNI. ZASTUPNICI I ZASTUPNICE SU PRISTUPILI/E GLASANJU I NAKON GLASANJA KONSTATOVANO JE DA JE SKUPŠTINA JEDNOGLASNO (21 “ZA”, 8 “PROTIV” I 5 “SUZDRŽANIH”) USVOJILA OVAJ PRIJEDLOG.

Nadalje, uslijedilo je glasanje po zaključku zastupnika Suljević Samira kojim se tražilo “stavljanju van snage zaključka Skupštine Kantona Sarajevo sa 21. Sjednice Skupštine Kantona Sarajevo održane dana 25.02.2020 godine, kojom se zabranjuje zapošljavanje državnih službenika aktuelnom sazivu Vlade Kantona Sarajevo u JP i institucijama koje se finansiraju iz budžeta Kantona Sarajevo“.

PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE O PREDLOŽENOM ZAKLJUČKU. ZASTUPNICI I ZASTUPNICE SU PRISTUPILI/E GLASANJU I NAKON GLASANJA KONSTATOVANO JE DA SKUPŠTINA NIJE USVOJILA (16 “ZA”, 10 “PROTIV” I 7 “SUZDRŽANIH”) OVAJ ZAKLJUČAK.

Zastupnik Samir Suljević je izrazio sumnju u glasanje pa je uslijedilo pojedinačno izjašnjavanje.

Sekretar po ovlaštenju Almira Kulovac Šetkić:

1. Aljović Hamed PROTIV
2. Bešlija Vildana ZA
3. Bišćević-Tokić Jasmina SUZDRŽANA
4. Čampara Aljoša SUZDRŽAN
5. Čelik Mirza PROTIV
6. Ćosović-Hajdarević Samra PROTIV
7. Delalić Sabahudin SUZDRŽAN
8. Dević Mahir SUZDRŽAN
9. Dizdarević Neira ZA
10. Duraković Jasna ZA
12. Hasagić Amra SUZDRŽANA
13. Hasanović Senad PROTIV
14. Hodžić Admela PROTIV
15. Jakupović Vedran ZA
16. Junuzović-Kaljić Amra ZA
17. Kerla Bibija PROTIV

18. Konaković Elmedin ZA
19. Krstić Danijela ZA
20. Marić Zvonko SUZDRŽAN
21. Marjanović Damir ZA
22. Mekić Amel ZA
23. Memić Arijana OPRAVDANO ODSUTNA
24. Milavica Sead PROTIV
25. Nikšić Damir ZA
27. Pecikoza Fahrudin PROTIV
28. Pleho Haris SUZDRŽAN
29. Poturak Dževad SUZDRŽAN
30. Srna- Bajramović Segmedina ZA
31. Stojanović Igor ZA
32. Suljević Samir ZA
33. Šahman Bilsena SUZDRŽANA
34. Viteškić Smiljana PROTIV
35. Vreto Elvis ZA

NAKON POJEDINAČNOG IZJAŠNJAVANJA KONSTATOVANO JE DA SKUPŠTINA NIJE USVOJILA (16 “ZA”, 9 “PROTIV” I 9 “SUZDRŽANIH”) OVAJ ZAKLJUČAK.

AD -3.

PRIJEDLOGU ODLUKE O IZBORU PREDSEDavajućih, ZAMJENIKA PREDSEDavajućih I ČLANOVA STALNIH RADNIH TIJELA SKUPŠTINE KANTONA SARAJEVO

Prijedlog odluke su zastupnici i zastupnice dobili/e u dopunskom materijalu.

Zastupnik Mahir Dević kao predlagač je podnio uvodne napomene: “Mi smo na Kolegiju Skupštine Kantona Sarajevo donijeli bili jedan zaključak da svi predstavnici političkih stranaka dostave svoje prijedloge za zamjenu članova u svim skupštinskim komisijama, naravno nakon što je promijenjena Komisija za izbor imenovanje. Kolege iz bivše parlamentarne većine da ostaju pri svojim prijedlozima. Nove prijedloge su dostavili nezavisni zastupnici, njih iz kluba čini mi se pet. Mi smo to razmatrali na nekoliko sjednica komisije, pokušali smo evo na neki način da udovoljimo maksimalno koliko smo bili u stanju da udovoljimo. Naravno to je bilo nemoguće da se ispoštuju na neki način sve želje koje su se pojavile u tom procesu, ali evo cijenim da smo barem 70 do 80% uspjeli da tih imena usaglasimo. Vodili smo računa o pozicijama koje su zastupnici obnašali u komisijama i prije. Onoliko koliko smo mogli struku i aktivnosti i afinitete određenih da uvažimo uvažili smo. Bilo je nekih promjena u imenima unutar političkih stranaka, tako da evo imate taj materijal uz jutrošnji amandman, to je ustvari prijedlog tih komisija koje smo evo čini mi se tri sjednice Komisije za izbor i imenovanje rješavali ako sam dobro ovo rekao sekretaru. Eto, toliko u uvodu, kratko.”

Zastupnik Vedran Jakupović se javio za pitanje vezano za Komisiju za sigurnost i ostale Komisije.

Zastupnica Vildana Bešlija je ukazala na tehničku omašku vezano za članicu Komisije za budžet i finansije Lejle Dragnić, uz naglasak da je ona delegirana ispred Naše stranke.

Dopredsjedavajuća Danijela Kristić je također postavila pitanje vezano za sastav Komisije za sigurnost.

Zastupnik Senad Hasanović je intervenisao radi javnosti i radi kolega zastupnika, te napomenuo da je diplomirani politolog iz oblasti sigurnosti te da će definitivno u toj komisiji biti ljudi koji su od struke.

Nadalje, zastupnik Elmedin Konaković je postavio pitanje vezano za sastav Komisije za sigurnost,

NAKON ISCRPLJENE LISTE PRIJAVLJENIH ZA PITANJA, PREDSJEDAVAJUĆI JE POZVAO ZASTUPNIKE I ZASTUPNICE DA PRISTUPE IZJAŠNJAVANJU O PRIJEDLOGU ODLUKE O IZBORU PREDSJEDAVAJUĆIH, ZAMJENIKA PREDSJEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO.

NAKON ELEKTRONSKOG GLASANJA “ZA” JE GLASALO 20 ZASTUPNIKA, “PROTIV” 13, i “SUZDRŽAN” 1, SKUPŠTINA JE DONIJELA OVU ODLUKU.

Zastupnica Neira Dizdarević je izrazila sumnju u glasanje pa je Sekretarka po ovlaštenju Almira Kulovac Šetkić provela pojedinačno izjašnjavanje:

1. Aljović Hamed ZA
2. Bešlija Vildana PROTIV
3. Bišćević-Tokić Jasmina ZA
4. Čampara Aljoša ZA
5. Čelik Mirza ZA
6. Ćosović-Hajdarević Samra ZA
7. Delalić Sabahudin ZA
8. Dević Mahir ZA
9. Dizdarević Neira PROTIV
10. Duraković Jasna SUZDRŽANA
11. Handžić Vibor PROTIV
12. Hasagić Amra ZA
13. Hasanović Senad ZA
14. Hodžić Admela ZA
15. Jakupović Vedran PROTIV
16. Junuzović-Kaljić Amra SUZDRŽANA
17. Kerla Bibija ZA
18. Konaković Elmedin PROTIV
19. Krstić Danijela PROTIV
20. Marić Zvonko ZA
21. Marjanović Damir SUZDRŽAN
22. Mekić Amel PROTIV
23. Memić Arijana OPRAVDANO ODSUTNA
24. Milavica Sead ZA
25. Nikšić Damir SUZDRŽAN
26. Okerić Elvedin PROTIV
27. Pecikoza Fahrudin ZA

28. Pleho Haris ZA
29. Poturak Dževad ZA
30. Srna- Bajramović Segmedina PROTIV
31. Stojanović Igor PROTIV
32. Suljević Samir PROTIV
33. Šahman Bilsena ZA
34. Viteškić Smiljana ZA
35. Vreto Elvis SUZDRŽAN

NAKON POJEDINAČNOG IZJAŠNJAVANJA, KONSTATOVANO JE DA JE SKUPŠTINA, VEĆINOM GLASOVA (18 “ZA”, 11 “PROTIV” I 5 “SUZDRŽANIH”) DONIJELA OVU ODLUKU.

AD - 5.

PRIJEDLOG BUDŽETA KANTONA SARAJEVO ZA 2020. GODINU

Materijal su zastupnici i zastupnice dobili/e uz poziv za sjednicu.

Ministar finansija Jasmin Halebić je imao uvodno izlaganje po Prijedlogu budžeta Kantona Sarajevo za 2020. godinu.

Nakon izlaganja ministra finansija, otvoren je prostor za pitanja i prva koja se prijavila bila je dopredsjedavajuća Danijela Kristić, zatim zastupnica Vildana Bešlija, pa zastupnica Segmedina Srna Bajramović, zastupnik Elmedin Konaković, zastupnik Elvedin Okerić, zastupnik Damir Nikšić, zastupnik Vedran Jakupović, zastupnik Damir Marjanović, zastupnik Igor Stojanović, zastupnica Jasna Duraković, zastupnik Elvis Vreto, zastupnica Neira Dizdarević, zastupnica Jasmina Bišćević-Tokić i zastupnik Samir Suljević.

Nakon pitanja, zastupnik Elmedin Konaković je zatražio pauzu od pola sata kako bi se ministri pripremili za odgovore.

Predsjedavajući je dao na glasanje pauzu u trajanju od sat vremena i Skupština je odobrila pauzu sa (23 “za” i 2 “protiv”).

NASTAVAK NAKON PAUZE u 15,00 SATI

Predsjedavajući je pozvao članove Vlade da se obrate Skupštini. Prvi koji se obratio Skupštini bio je premijer Mario Nenadić, zatim ministar finansija Jasmina Halebić, pa ministar Ismir Jusko, zatim ministar Kenan Alikadić, ministar Faruk Kapidžić, ministrica Nihada Glamoč, ministar Anis Krivić i ministar Hajrudin Grabovica.

Zastupnica Neira Dizdarević u ime Kluba Naše stranke zatražila pauzu od 20 minuta.

NASTAVAK NAKON PAUZE

Zastupnica Neira Dizdarević je dala obrazloženje za pauzu u smislu da su bile potrebne kratke konsultacije u Klubu Naše stranke.

U nastavku, predsjedavajući je otvorio diskusiju i u njoj su učestvovali sljedeći zastupnici/zastupnice: Elmedin Konaković, Elvedin Okerić, Damir Marjanović, Igor Stojanović, Vildana Bešlija, Segmedina Srna Bajramović, Elvis Vreto, Vedran Jakupović, Amra Junuzović – Kaljić, dopredsjedavajući Vibor Handžić i Neira Dizdarević.

Nakon diskusija Skupštini se još jednom obratio ministar finansija Jasmin Halebić.

Zastupnik Vedran Jakupović je intervenisao vezano za obraćanje ministra nakon zaključene rasprave.

PREDSJEDAVAJUĆI JE POZVAO ZASTUPNIKE I ZASTUPNICE DA SE IZJASNE O PRIJEDLOGU BUDŽETA KANTONA SARAJEVO ZA 2020. GODINU. ZASTUPNICI I ZASTUPNICE SU PRISTUPILI/E GLASANJU I NAKON GLASANJA KONSTATOVANO JE DA JE SKUPŠTINA JEDNOGLASNO (34 “ZA”) DONIJELA BUDŽET KANTONA SARAJEVO ZA 2020. GODINU.

AD – 6.

PRIJEDLOG ZAKONA O IZVRŠAVANJU BUDŽETA KANTONA SARAJEVO ZA 2020. GODINU

Materijal su zastupnici i zastupnice dobili/e uz poziv za sjednicu.

PO OVOM PRIJEDLOGU ZAKONA NIJE BILO UVODNIH NAPOMENA, NITI PRIJAVLJENIH ZA PITANJA ILI DISKUSIJU, PA SU ZASTUPNICI I ZASTUPNICE POZVANI/E DA PRISTUPE GLASANJU O PRIJEDLOGU ZAKONA O IZVRŠAVANJU BUDŽETA KANTONA SARAJEVO ZA 2020. GODINU.

NAKON GLASANJA KONSTATOVANO JE DA JE SKUPŠTINA JEDNOGLASNO (34 “ZA”) DONIJELA OVAJ ZAKON.

AD – 7.

PRIJEDLOG ZAKONA O KAŽNJAVANJU GOVORA MRŽNJE KANTONA SARAJEVO - SKRAĆENI POSTUPAK

Materijal su zastupnici i zastupnice dobili/e uz poziv za sjednicu.

U skladu sa članom 158. stav 2) Poslovnika Skupštine Kantona Sarajevo predsjedavajući je pozvao predstavnika Predlagača da ukratko obrazloži razloge za donošenje Prijedloga zakona po skraćenom postupku.

Zastupnik Damir Marjanović je informisao da su stigle zanimljive i sugestije i komentare, te je predložio da Zakon ide u redovnu proceduru kao nacrt.

Zastupnik Damir Marjanović je podnio uvodne napomene uz prezentaciju, te dao rok trajanja rasprave 30 dana. S obzirom da nije bilo pitanja otvorena je diskusija. U diskusiji po ovom

Nacrtu učestvovali su sljedeći zastupnici i zastupnice: Jasmina Bišćević-Tokić, Vildana Bešlija, Mahir Dević, Elmedin Konaković, Elvis Vreto, Zvonko Marić, Jasmina Duraković, Igor Stojanović i Damir Nikšić.

Prije samog glasanja o ovom Nacrtu zastupnik Damir Marjanović se javio za riječ.

Predsjedavajući je zaključio raspravu i predložio da Skupština po Nacrtu zakona o kažnjavanju govora mržnje Kantona Sarajevo donese sljedeće Zaključke:

1. Utvrđuje se Nacrt zakona o kažnjavanju govora mržnje Kantona Sarajevo.
2. Javna rasprava održat će se u kantonalnim organima, jedinicama lokalne samouprave, naučnim i stručnim ustanova i trajat će **90 dana**.
3. Primjedbe, prijedlozi, sugestije zastupnika i mišljenja radnih tijela Skupštine dostavljaju se zastupniku Damiru Marjanoviću koji organizuje i provodi javnu raspravu.
4. Zastupnik Damir Marjanović dužan je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o kažnjavanju govora mržnje Kantona Sarajevo.

NAKON ELEKTRONSKOG GLASANJA KONSTATOVANO JE DA JE SKUPŠTINA JEDNOGLASNO (29 “ZA”) DONIJELA OVE ZAKLJUČKE.

AD – 8.

PRIJEDLOG ODLUKE O DAVANJU SAGLASNOSTI NA FINANSIJSKI PLAN JAVNE USTANOVE „SLUŽBA ZA ZAPOSŁJAVANJE KANTONA SARAJEVO“ SARAJEVO ZA 2020. GODINU SA ODLUKOM O IZVRŠAVANJU FINANSIJSKOG PLANA JAVNE USTANOVE „SLUŽBA ZA ZAPOSŁJAVANJE KANTONA SARAJEVO“ SARAJEVO ZA 2020. GODINU

Materijal su zastupnici i zastupnice dobili/e uz poziv za sjednicu.

Zastupnica Bilsena Šahman je prva postavila pitanje: “Naravno mi ćemo ovo podržati, finansijski plan JU, ja hoću nešto drugo da pitam. Jučer sam propratila u medijima da su imali potpisivanje ugovora, okupljanje je bilo za obuku ida su skupili 328 ljudi plus predavače u Domu mladih Skenderija a nakon objave da se skupovi ne održavaju sa više od 250 ljudi. Šta to znači? Da sada imamo širenje i nepoštivanje onoga što donese krizni štab od JU, a očekujemo to od privatnih. Eto to da mi neko odgovori zašto su se oglašili na Odluku kriznog štaba?”

Pitanja po ovom Prijedlogu odluke imali su zastupnik Elmedin Konaković, zastupnik Sead Milavica, zastupnik Damir Nikšić, zastupnica Bibija Kerla,

Ispred Javne ustanove Služba za zapošljavanje odgovore je dao Igor Kamočaj i nakon njegovog obraćanja rasprava je zaključena.

PREDSJEDAVAJUĆI JE POZVAO ZASTUPNIKE I ZASTUPNICE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA

FINANSIJSKI PLAN JAVNE USTANOVE „SLUŽBA ZA ZAPOSŁJAVANJE KANTONA SARAJEVO“ SARAJEVO ZA 2020. GODINU SA ODLUKOM O IZVRŠAVANJU FINANSIJSKOG PLANA JAVNE USTANOVE „SLUŽBA ZA ZAPOSŁJAVANJE KANTONA SARAJEVO“ SARAJEVO ZA 2020. GODINU.

NAKON ELEKTRONSKOG GLASANJA KONSTATOVANO JE DA JE SKUPŠTINA JEDNOGLASNO (28 “ZA”) DONIJELA OVU ODLUKU.

Nakon glasanja po posljednoj tački dnevnog reda. Predsjedavajući je zaključio rad na 22. Radnoj sjednici i zahvalio se uvažanim kolegicama i kolegama.

Zapisnik izradila:

Jasminka Deliahmetović

Po ovlaštenju

**SEKRETAR
AJUĆI**

**SKUPŠTINE KANTONA SARAJEVO
SARAJEVO**

Almira Kulovac Šetkić, dipl. Pravnik

PREDSEDAV

SKUPŠTINE KANTONA

Dr. Mirza Čelik